



明詩綜卷四

小長蘆

朱彝尊

朱彝尊

練川

張大受

緝評

劉松 五十四首

松字子高泰和人明初以人材舉授兵部職方

司郎中遷北平按察司副使坐事輸作京師尋

放還徵拜禮部侍郎署吏部尚書請老許之復

名為國子司業有槎翁集

宋景濂云子高天賦超逸之才加以稽古之力雕肝琢腎宵吟

夕詠而又得師友之資江山之助五美云備詩於是乎大昌凌厲頓迅

多至千餘篇遭亂呻吟轉側二十餘年不為少折既貴澹然如布衣北

平去家五千里惟一僮侍則已復建還嗚呼時吏退獨處一室據几吟詠

夜分不休其年愈老思愈壯詩愈工時豫章萬白大梁辛敬襄城楊士

弘稜陵周頊鄭大同皆以歌詩自雄子高與之馳騁上下名聲相埒

明詩綜卷四

王元美云劉子高如雨中素馨雖復嫣然不作寒梅老樹風骨 胡元

瑞云國初吳詩派昉高季迪越詩派昉劉伯溫閩詩派昉林子羽嶺南

詩派昉孫仲衍江右詩派昉劉子高五家才力咸足雄據一方先驅

當代第格不甚高體不甚大耳 顧文玉云子高虛澹不墮習氣

靜志居詩話子高句鏤字琢頗具苦心惜其體弱局於方程不

能展拓於唐近大曆十子於宋類永嘉四靈於元最肖陸天錫

東方行

東方閃閃啼早鴉美人愁眠隔窗紗桐華樹下人來往

銀牀轆轤夢中響

姑蘇曲

姑蘇城頭烏夜啼姑蘇臺上風淒淒芙蓉露冷秋香死

美人夜泣雙蛾低銅龍咽寒更漏促手撥繁絃轉紅玉

鴛鴦飛去屨廊空猶唱吳宮舊時曲

過南州訪友同王子與羅子理分韻得滿字

連阜行平皋深林闕虛館揚襟暢遐思散帙延清款溪
尊花纂纂田黍實纂纂逕迴阡彌永水落澗初滿載欣
秋稼登矧愜人事罕欲往悲曠塗言歸理修疇

歲暮南歸留別蕭翀

旅寐不能旦披衣坐牀帷屋角曉色動鳥鳴已多時起
坐出庭際雲物正華滋殘雪未盡消羣山鬱參差即此
念故園焉得不懷思矧屬歲運周返駕固其宜理策望
前路揖君從此辭窮檐有稊子但訝歸來遲

辛丑正月二十二日述志

經年掩扉卧迹與城市遙誰為拔茹計乃以仕見招本
昧平生素敢勞中道要公檄臨我門戒命在夕朝九江
今雄州邁往方迢迢有母誰與居念之中心焦起揖謝
來客我何希市朝澹然一室內宴坐風寥寥

游三華山

龍門兩山負一水下迴繞蒼峽忽中開飛橋出林杪盤
盤石磴引纂纂松林窅危闌正西挂層閣復東繚樹暗
盡含雲花明忽聞鳥懸厓傷架棧鑿石潛通突早聞三
仙人棲化迹已杳常疑雲月上顏色靚清皎丹井舊時
深朝真亂來少荒壇翳霜蒹虛館闕叢篠凝神觀衆妙
屏迹謝羣擾懷賢嘔重鴆振翼思遠矯佳境能娛人何
因致清醪

早行霧中過田家失道

我行煙霧中不復辨原陸幽間雞犬隱隱見松竹田
家迷遠近阪路有崎曲已覺瞻望勞誰云往來熟
舍弟往三坳嶺尋鱣子日夕未歸坐候林下

西林已雞棲北澗復蟲響沉沉四山暝寥寥一星上時
危劇鍾情期逝勞紆想悵立此溪陰欲休未能往

江干艸居

江干愜幽屏草扉亦常關晚塗斷歸人虛市見寒山林
木變冬候繇綠忽已殷鳴鳥相因依孤雲時去還唐虞
既云遠慨此時獨艱四體豈不勤我髮日已斑遨遊千
載上偃仰一室間樂詠古人書庶幾無覲顏

和答蕭國錄八月十一夜對月有懷之作

明詩綜卷四

三

林塘澹清華庭宇豁虛朗露井波澄輝風林葉交響高
言倡令德孤吟振遐想亭亭江上月肅肅雲鴈往美又
浩前期令節延遠望池魚既堪綸旨酒亦可釀永懷契
天游庶以會心賞宇宙本達觀如何較銖兩

題秋江待渡圖為蕭學士賦

小航衝風岸將及行人下馬沙頭立水闊雲深野渡閒
天寒日暮歸心急人生行役安可休到江路盡還通舟
誰能裹足山中老不識風波一日愁

題余仲揚画山水圖為余自安賦

金華仙人余仲揚筆墨蕭疎開老蒼昨看新圖湖上宅
烟霧白日生高堂層峰上蟠石皜皜絕島下瞰江茫茫

長松竝立各千丈間以灌木相低昂松下上人坐碧草
秋影忽落衣巾涼囊琴未發絃未奏已覺流水聲洋洋
赤城霞氣通鴈蕩巫峽雨色來瀟湘誰能千里坐致此
欲往久歎河無梁風塵漲天蔽吳楚六年悵望神慘傷
玄猿苦啼巖北樹白鴈不到江南鄉赭山焚林絕人迹
如此山水非尋常此圖本為自安寫亦感同姓悲殊方
幽軒素壁泉聲動對此令我心為狂何由捫蘿逐麋鹿
振衣直上雲中岡登臨一寫漂泊恨長嘯清風生八荒

題溪山春曉圖寄贈蕭翀

土山戴石石角傾偃樹雜出如幢旌青天微茫曉色動
雨氣合沓千峰晴野橋西邊有村路之子鳴鞘踏雲去

明詩歸卷四

四

重巖花發似聞香隔水鶯啼不知處東南連年飛戰塵
如此山水何清新石田到處長荆棘豈有荷耒春耕人
我昨西遊登武姥手抉雲霞望仙府把酒忽逢東海生
醉臥溪南紫蘿雨紫蘿陰陰覆巖扉十日尋幽行未歸
雲峰流泉半空落六月飛雪霑人衣拂衣歸隱知何日
却對畫圖心若失不聞流水渡溪還時見浮雲向山出
懷哉桃花修竹林江海秋高煙霧深豈無耕釣在田野
誰識悠悠沮溺心

寄曾郁文短歌

澄江水向東流流向東昌江上頭我有故人在江上十
年不見增煩憂白沙水聲寒活活黃巖雲氣凝清秋豈

無沙棠柀吳女謳可載酒同遨遊
狂風吹山波浪惡使我不得回輕舟
翩翩雲中雙飛燕銜書寄我頻留戀
書中展轉道深情但恨相思不相見
春燕飛來秋復歸報書不遣壯心違
碧蘭紮蕙何由采即恐蕭條霜露稀

題曾郁文所藏山水小景

隔溪望見林間屋沙漱陰陰俯羣木
溪流合處一橋孤春雨來時萬山綠
江南此景真可憐米家筆意誰能傳
却憶故廬珠浦上短籬長繫釣魚船

題山水畫軸

瀑布雙垂下屏風九疊張波光混
彭蠡山勢似潯陽松塢棲茅屋
楓林帶石梁扁舟如可具吾意在滄浪

明詩綜卷四

五

張氏溪亭雜興二首

草閣經秋靜菰扉近水開
霜林收橘柚風磴坐莓苔
釣艇寒初放樵歌晚獨回
城南車馬地欲往更徘徊
寒霧依山斂晴沙與岸頽
林塘無路入窗戶有時開
野客鈔書去鄰翁送酒來
幽期在蘿薜莫遣暮鐘催

題陽靈洞

仙宇何年闢靈泉盡日聞
石門通別殿木棧倚高雲
鸞鳳時來下獼猴近作羣
春風城郭暮煙霧正紛紛

題彭氏背郭茅堂圖

日薄金華嶺雲深白石塘
茅茨元背郭水竹自成鄉
圖畫看逾好登臨興不忘
門前雙杏樹葉葉是秋霜

過龍灣五王閣訪友人不遇

野橋秋水落江閣，暝煙微白日又欲。午高人猶未歸，青林依石塢虛館。淨紫扉坐久，思題字翻憐柿葉稀。

再懷伯兄子中時有同客興國者從間道先歸，兄以道阻後期不果。

貧賤輕離別，艱危味死生。獨違同里伴，仍阻異鄉程。愛想深山憩，愁聞間道行。幾時秋樹下，慰此淚縱橫。

玉華山

翠巘千峰合，丹崖一徑通。樓臺上雲氣，草木動天風。野曠行人外，江平落鴈中。傷心俯城郭，煙雨正溟濛。

題李志謙書舍

明詩綜卷四

六

溫家亭子三江口，坐對東風兔子寮。錦石白沙寒歷歷，碧雲紅樹晚蕭蕭。簾虛易覺天光切，衣潤常疑霧氣飄。賴有石門支道在，題詩長日出溪橋。

舟次樵墩憶故人鄭同夫

浦口維舟日欲晡，柳村桑塢帶縈紆。獨尋古道黃埃滿，忽憶故人秋興孤。螺蚌儘供溪女拾，雞豚偏稱野人呼。西山隔水清如玉，誰與題詩送酒壺。

奉同曠伯達周叔用徐仲孺登秋屏閣是日聞淮郡有警風沙黯然賦呈萬德躬孫伯虞諸君子

古剎蕭條隱石根，荒城高下帶沙墩。斷雲南鴈日初出，曠野北風天正昏。羽檄屢傳淮甸急，龍艘猶滯海門屯。

湖山不盡登臨興回首鄉園獨愴魂

入城

江水依然抱石磯獨行空感舊游非晚山當戶日初落
秋草滿城人未歸田鼠引羣穿井出山雞求食傍簷飛
向來車馬東門路忽憶朋游淚滿衣

漫興

山下碧溪渾欲平溪邊春事總關情定巢新燕忽雙過
隔水雛鶯時一鳴凍入秧畦愁近雪光涵風浦愛新晴
南園草綠無人到應是滿林春筍生

客情

清明已過寒雨稀客情物色共依微庭前幽草忽如積

明詩餘卷四

七

江上落花渾欲飛風雲慘澹隨長戟塵土蕭條上短衣
雲亭江上麥田熟昨夜月明還夢歸

將歸南平發舟戲賦

梅演山前聞鴈來珠湖渡口放船回晚雲出嶺作疎雨
秋水滿江生綠苔故里風煙頻入夢中年世事獨興哀
飄搖莫戀詩千首斷送深憑酒一杯

秋日承廬陵曲山蕭壽春過林居臨別賦贈

秋露滿園衆葉飛遠煩江上問柴扉青山古道獨行晚
白髮故人相見稀細雨高原禾黍熟斜陽疎樹橘橙肥
殘年甚欲留君住何事驪駒只賦歸

早春燕城懷古

二首

金水河枯禁苑荒東風吹雨入宮牆樹頭槐子乾未落
沙際草芽青已黃北口晚陰猶有雪薊門春早漸無霜
城樓隱映山如戟笳鼓蕭蕭送夕陽

宮樓粉暗女垣欹禁苑塵飛輦路移花外斷橋支鼻鼻
草間壞壁綴罍酒坊當戶懸荷葉兵壘綠渠插柳枝
不見當年歌舞地空餘松柏鎖荒祠

陶皮石室

自注即今北巖古陶皮二仙修煉之所天將雨則巖
竇有泉出焉禱者嘗以爲候舊名觀音巖今正之

北巖極谿訝三面環絕壁聞有山雨來石泉先暗滴

峭壁蘭

巖石下陰陰猗蘭綠如翦花發人不知秋香入苔蘚

題李唐牧牛圖

二首

明詩綜卷四

八

天寒放牛遲野曠風獵獵獨來長林下吹火燒山葉
日夕山氣昏獨歸愁路遠猶戀草青青遲回下長阪

江上

沙觜微波漾綠蘋山頭落日駐紅輪依稀燈火楓林鼓
岸上人家賽水神

步月

乘涼步月過西鄰草露霏微濕葛巾一逕竹陰無犬吠
飛螢來往暗隨人

八月十一日自水南渡江道金華過北巖訪蕭鵬
舉是日雲陰掩冉不見日色道中賦絕句

八月棠梨露葉紅荒陂古水湛青銅秋風依舊巖前路

高下寒山落日中

正月十九日

金魚洲下放船開華石潭邊看雨來愛殺南天雙白鷺
青山盡處却飛回

題枯木竹石

二首

木葉欲脫天雨霜竹枝乍低風已涼三湘落日流波白
行子繫船思故鄉

平沙竹樹晚粼粼楚客維舟近峽南忽憶微雲將雨過
滿林秋色照江潭

題超上人墨菊

露香秋色淺深中青蕊黃花自一叢最憶南園微雨過

明詩綜卷四

九

短籬扶杖看西風

蒼石峽中見道人蒼居隔水山花盛開

蒼石峽中花藥欄舊時草屋傷巖安道人去後松橋斷
縱有花開隔水看

題三岡寺

石橋流水帶人家紬殿春陰閣岸沙啼鳥數聲山雨歇
門前落盡白桐花

寒夜

馬斫枯菱寒夜長風如箭鏃射陰房不知門外三更雪
誤起開門看月光

送別叔銘出順承門

送客出城秋已涼
太行南上楚天長
順承門外斜陽裏
蕎麥花開似故鄉

望漢獻王陵

單家橋下雪橫冰
草樹連雲掠凍鷹
漢業已荒河水在
行人遙指獻王陵

高唐州道中

北風吹沙官道長
兩旁楊柳間榆桑
何時走馬重來此
要看清陰六月涼

周

湏
三首

湏字伯寧江寧人
明初任饒州長史
陞湖廣都

事旋擢刑部尚書
降惠州經歷

周吉父云伯寧望九華詩云巖回氣如熾峰去

明詩綜卷四

十

勢猶引佳句也

始發建業登龍江山祠感懷有作

去國思舊遊
尋山發幽眺
遙凌天門石
恍對臨海嶠
神關列雄鎮
危堞抱遺廟
秋陰散氛翳
炎景扇餘燎
燦天水遠自空雲
霞近爭耀容
行始多感世
事紛難料
同俗豈素懷
趨時固殊調
既為達士恥
復被逐臣誚
行矣庶無欺
忠信將可劬

舟中望九華山

貞履無素期
勞生意恒窘
誰云戒戎路
曾是返初隱
水宿淹長晷
山行阻修軫
縹緲對雄標
巒岒發奇蘊
巖回氣如熾
峰去勢猶引
刻削冠青蓮
雕鏤轟丹筍
嵒霞上

斑剥石乳下礪礪山鬼從文狸淵靈闕玄蜃眩言志藜
藿未遂采芝菌即事情已悲懷賢迹俱泯潛吳媿梅福
去汶羞閔損人德險未夷天道明可準皋蘭豈徒歌巖
桂芳未隕歲暮山中人寤歌一作候歸軫

賽小姑廟

育秀凌華嵩標奇奠淮楚陽闢啓神關陰沉開水府林
林聚商舳淵淵聞戍鼓陳瑟會安歌傳芭紛代舞椒漿
既芬潔桂櫂方容與日暮懷歸情含涕望修渚

黃

肅

五首

肅字子邕江西新城人元季官禮部主事自北

平來見命仍故官陞侍郎已降郎中復陞工部

明詩綜卷四

十一

侍郎任尚書未幾出參政廣西坐黨禍死有醉

夢奠

王子充云子邕詩簡易平質一
本漢魏絕去近代聲律之習

詩話尚書匣鏡一篇當是懷故主遠在沙漠而作其
云夫子新好合不能思故家則刺同時佐命之臣也

短歌行

來日苦少去日苦多人生不滿百痛當奈何不如沽美
酒與君長笑歌峻坂無停車急川無停波人生不滿百
當復奈何來日苦少去日苦多

詠懷

三首

少壯好游覽不知中道憂方茲懷故土眷此成淹留員
闕蔽朝暉玄雲陰以浮徘徊當永夕嫵婉將焉速棲鳥
翔不息鳴蟲亦啾啾人生無定止卒歲何能休

流水日夜流厚土何不盈人生自不已四運迭相承達
士識物化昧者徒營營蕩蕩晨風來悠悠天宇清會當
撥塵務聊復從吾生追呼心所歡置酒坐中庭忘言勿
復辨觴盡還復傾

匣鏡三十年塵暗不復冶停餐且不寐所思知為誰蕩
子不復返眇在天一涯綻衣終當組道遠何能持明明
天邊月三五入中閨念與子歡愛不得同光輝寤言相
與共既覺將何依

客中書懷

竹裏山雞啼未休江南二月景如秋半簾花雨寒侵袂
一片江雲晚倚樓亂世青春如過夢少年華髮忽盈頭
故園動是經年別滿眼干戈添客愁

明詩綜卷四

十一

牛諒 三首

諒字士良東平人流寓吳興以秀才舉除翰林

典簿使安南還擢工部員外郎歷禮部尚書降

主事尋復任免有尚友齋集 郁伯承云兪州別集以公

之例子檢科試考有掌卷官工部員外郎牛諒又宋學士慶成宴詩序
有工部侍郎牛諒是由員外侍郎而至尚書亦循序而遷也公優於文
學嘗與唐應泰肅有丁未九月聯句蓋國初才子 鄭正畦云實錄洪
武七年十二月癸丑罷禮部尚書牛諒官諒初為禮部尚書以忘職降
為本部主事未幾復為尚書至是又以不任職罷是諒為工部員外特
郎皆在洪武七年禮部尚書之前兪州劉集謂公從主事為尚書收入
起遷之例似與實錄及科

試考慶成宴詩序不合

詩話尚書流寓吳興時過橋李與鮑恂仲李丘民克莊張翼翔南王綸
昌言聞人麟彥昭曹宥新民徐一夔大章尤存以仁及呂安迥來志道
周鼎常員釋智寬等集郭西景德寺攜酒賦詩其在南京則與唐肅處
徽林公慶孟善陳世昌彥博徐一夔大章張翼翔南朱升九升會飲臨

句及同張以寧志道使安南志道賦長句以贈有云更直清詩慰遲暮
蓋當日風雅之林每屈一指不徒以功名顯也又在元時中甲午大魁
亦見志
道詩句

西郭憩景德寺分韻

靈湫閔白龍古殿敞金粟僧歸林下定雲倚巖端宿伊
余陪勝引於此避炎酷暑息陰悟道性習靜外榮辱坐石
飛清觴每歎白日速別去將何如留詩滿青竹

紅梅

隴頭人未來江南春幾許惆悵玉簫聲吹落胭脂雨

畫梅

梨花雲底路參差折得春風玉一枝南雪未消江月曉
欲從何處寄相思

明詩綜卷四

十三

朱夢炎

夢炎字仲雅進賢人元進士入明為國子博士

遷翰林修撰出為浙江按察司經歷轉山西行

省員外郎入為禮部員外郎擢本部侍郎陞尚

書

錢塘西湖

萬戶煙消一鏡空水光山色畫圖中青樓燕子家家雨
錦浪桃花岸岸風櫂轉舞衣凝暮紫簾開歌扇露春紅
蘇公堤上垂楊柳尚想重來試玉驄

楊訓文

二首

訓文字克明潼川人元淮海書院山長遇亂居

江都明初徵為起居注兩遷左司郎中丙午年
自太常卿知湖州移知汀州歷禮部尚書改戶
部出為河南行省參知政事卒

詩話元詩筆者易流於穢真酸齷輩是也清者每失之弱陸天錫等是也明初若劉子高蘇平仲楊克明其源皆出於天錫質贏之恨諸公不免

贈友

與子分攜後星霜二十年重逢驚老大惜別更留連
花落春江雨鷓啼綠樹煙幽懷浩難寫愁隨酒尊前

寄石仲文

故人別後復如何不寄新詩到薜蘿
賈誼書成何日上張衡愁比向時多
江城木落霜連地澤國天寒水不波

明詩綜卷四

古

重約明年秋八月紫薇花底共鳴珂

滕

毅 三首

毅字仲弘鎮江人以儒士徵授起居注擢吏部

尚書出參政江西

詩話尚書詩不多傳亦具風骨秋興二詩仿佛宋文格過故宮之作

姊歸即楚王臺舊基為新城

春風夔子國落日楚王臺江遶西陵下雲從上峽來
壯遊今已遂幽思獨難裁關塞猶戎馬吟邊首重回

次韻黃秀才秋興

二首

西風如水灑絺衣無數南來候鴈飛朔漠地寒收王氣
岷峨秋盡斂餘暉三泉忽報金棺葬萬國同瞻玉壘歸

相見不須談往事百年耆舊眼中稀

虎戰龍爭二十秋江波日夜自東流道旁無語王孫泣
天際含顰帝子愁首著風煙空壁壘蒹葭霜露滿汀洲
古來維有西山月永夜依依照白頭

錢用子

一首

用壬字成夫廣德人元翰林國史院編修出為
江浙行省左右司員外郎既而參平章張士信
軍事於淮安陞參政歸附後授按察副使歷禮
部尚書洪武元年十二月告老賜居湖州

李題米敷文煙巒曉景

江上亂峰生暮煙隔江遙望水雲連西風戰艦今無數

明詩綜卷四

十五

不見米家書畫船

李質

一首

質字文彬德慶人元末以府掾聚兵二萬保障
封川等四郡者十五年全城歸附授中書斷事
遷大都督府洪武五年任刑部尚書出為浙江
參政終靖江王相有樵雲集

玉臺驛亭子

春去臺空迹已陳危亭傑出澗之濱清溪繞屋可濯足
好鳥隔江如喚人明月委波金澱澱青山帶雪玉嶙峋
桃花流水非人世或有漁郎來問津

吳雲

一首

雲字友雲宜興人洪武初授弘文館校書郎歷

刑部尚書參政湖廣奉詔招諭雲南死之

詩話尚書送李民瞻一律體格極似高季迪送沈左司詩而聲色不同未免近於土木形骸矣錄之以諗知言之君子

送李民瞻侍郎宣諭陝西

侍郎將命出金鑾道路傳呼遠近歡關內官曹迎使節
秦中父老識衣冠雲開太華三峰秀水遶黃河九曲寒
寄語渭川千畝竹西風還解報平安

張 籌一首

籌字惟中無錫人以薦授翰林應奉洪武八年
任禮部尚書降員外郎

徐子元云惟中剛健之氣未能全融而金石鏘然足洗俗樂之耳

朱中舍惠麓秋晴圖

明詩綜卷四

七

湖上羣山卧九龍泉頭一客坐雙松定知別去還相憶
夢入秋雲第幾重

吳 琳一首

琳字朝錫黃岡人召為博士歷浙江按察僉事
入充起居注洪武三年吏部尚書出知黃州以
老致仕

開化道中

重岡狹路倦登臨喜見溪流華步深楊柳樹邊舟小小
海棠花上雨沈沈一春王事過三月千里家書繫寸心
無補盛時縻好爵不才端合老雲林

嚴震直 二首

震直初名子敏字震直因御稱其字乃互易焉
烏程人明初由糧長授河南布政司參議累官

工部尚書致仕永樂初召令宣諭山西卒於澤

州有遣興集 朱平涵云嚴公遇建文帝吞金事見吾學編名卿續紀二書世所尊信無有易者然文皇入京在壬

午六月而嚴公之卒即在是年九月是時但知建文帝焚死後數年漸有傳在西南徵者於是使胡尚書訪張遺過鄭太監賞賜西域此時嚴

公捐館已久矣今其子孫據二書請於所司立祠立碑不知前後迥不相及也

詩話尚書由運糧萬石長嶽為布政司參議未之官留署通政司事歷工部尚書洪武三十一年春致仕建文元年己卯復以年老辭不與事

帝念其任事久留住京師考遣興集中有譙集賜第之榮心堂詩乃是年三月十五日事分韻者為董淳子倫茹尚書瑞高太常遜志任尚書

專泰程郁御史本立李尚書至剛鄭庶子濟黃侍郎福張尚書統高經歷德陽凡十有一人太常詩云偉哉尚書公致政鳴珂里賜第最幽敞

迎出京塵裏庶子詩云尚書遂休致賜第居京洛侍郎詩云司空居廟堂憂國焉如絲挂冠神武門賜第留京師歷歷可證而續藏書謂尚書歸老

在里長陵以兩馬來夾昇至京致身錄又稱靖難兵起時督餉山東皆安也載攷文皇帝實錄壬午七月二十三日詔云朕居藩邸凡百姓艱苦靡

明詩綜卷四

不知之數年來兵興北方之民疲勞尤甚朕所以舉義者為宗社生民計今宗社既安而北方之民未安朕夙夜不安乃命前工部尚書嚴震直戶部致仕尚書王鈿應天府尹薛正言等分往山西山東陝西等布政司巡視民瘼何弊當革何利當建速具奏來尚書受詔往山西是秋九月十一日病卒於澤州公解合之忠誠伯茹瑞所探嚴公神道碑無異初不聞奉長陵密詔往雲南訪建文帝也吾學編遜國表忠紀等書不知何所據信吞金為實列尚書為後死忠臣之首萬曆十九年巡按御史黃鍾疏請建祠榻曰旌忠烈在祀典越數十年其裔孫祇宇文昭作祠祀辨大指謂吾祖功業炳耀史冊何藉吞金一死以罔天下後世黃公欲顯吾祖適足以誣吾祖也噫文昭不欲誣其祖可謂賢子孫矣

棲霞真境

棲霞有真境遠在桂林間春風洞中瑤草綠桃花滿樹
春斑斑羣峰拔地幾千尺上有樓臺耀金碧興來直欲
一登臨王事有程留不得

永州舟中

瀟湘二水會零陵灘響惟聞浪作聲兩岸青山明月夜

画船行過永州城

朱同一首

同字大同休寧人自號紫陽山樵洪武中以人

材舉為東宮官進禮部侍郎尋被誣得罪有覆

詆集

題画

紫陌紅塵沒馬頭人來人去幾時休誰家有酒身無事
長對青山不下樓

丘民一首

民字克莊揚州人徙居嘉興洪武初為松江學

官後至禮部侍郎

明詩綜卷四

十八

送友人至杭

又隨南鴈度錢唐不道他鄉是故鄉江上秋風蓴菜美
山中春雨石田荒杜陵老去寧忘蜀江總歸來不是梁
欲采芙蓉贈君去錦雲零落倍淒涼

秦約四首

約字文仲鹽城人徙居崑山仕元為崇德教授

洪武初召拜禮部侍郎以親老辭歸再徵為漂

陽教諭有樵海集

江之水寄楊鐵厓

江之水流瀾瀾蕩漾雙鳧舟涉江采蘭芷蘭芷青青露
如洗下有一雙魴與鯉美人美人胡不來相思日暮江

風起

雜興

元冬十月文蟋蟀近我牀傷彼苔之華含英委清霜丈
夫四方志千金戒垂堂壯日不奮迅老矣徒慨慷

紀夢簡陳簡討

二首

宮車輾輾過神泉五色雲中望赭袍野膳不嫌涼餅滑

小奴花下翦春蒿

查夏重云是詩似指
庚申君北狩時事

吳蠶入繭染春紅繅盡柔絲未論功若得君王迴一顧

不辭白髮上陽宮

韓宜可 一首

宜可字伯時會稽人洪武初徵拜御史出為山

明詩綜卷四

十九

西布政謫雲南後起為左副都御史

詩話伯時詩見滄海遺珠句如松迷鶴徑渾無路花暗簫聲不見人青
天有月來今夜白髮無家度幾秋芳草東風沙上馬青山遲日柳邊鷺

均有
思致

五華山圖

五華之山上頭俯視東海如浮漚豈無四萬八千丈
亦有五城十二樓翠萼影落中天曉玉柱光含大地秋
何日相從陪杖屨西風林外一長謳

蘇伯衡 三首

伯衡字平仲金華人明初仕為國子學正擢翰

林院編修宋濂以翰林承旨致仕薦以自代台

至固辭賜文綺遣歸起教授處州以表箋忤旨

坐罪卒于獄有平仲集

劉伯溫云平仲詩文辭達而義粹識不凡而意不詭蓋明於理而昌

於氣也徐子元云平仲豐腴本牢之味與藜藿自別

詩話元時進賀表文觸忌諱者凡一百六十七字著之典章使人不知其法良善聰明孝陵恩威不測每因文字少不當意輒罪其臣若蘇平仲徐大章輩是也當日有事園丘惡祝冊有子我字將謹撰文者桂正字彥良言於帝曰予子履湯用于矣惜未有為平仲調解者竟獲死於獄悲夫六百六十七字者極盡歸化凶播晏徂哀奄味駕馭仙死病苦沒泯滅凶禍傾頽毀便仆壞破喉刑傷孤墜縻服布孝短夭折災困危亂暴虐昏迷愚老邁改替敗廢殺絕忌憂切患衰囚枉棄喪塚空陷厄艱忽除掃擯缺落典憲法奔崩摧殄隕墓構出祭真饗享鬼在穢怪漸愁夢幻弊疾遷塵元蒙隔眇去辭追考校湯荒古述師剝革墜違尸叛散慘怨尅及逆害戕殘偏枯卸靈幽沅埋挽升退換移暗了休離覆手斷收誅厭諱恤罪辜銜土別逝泉陵此延祐元年十一月取定擬至三年八月寬其禁矣其字樣雖難悉避然亦玉堂視草者所宜知也

送陳思可主簿赴進賢任

一別十五年倏忽若昏旦相逢京城中幸脫戎馬亂宦

明詩綜卷四

二

遊我何成鬢髮子已換留連一尊酒寂寞四門館剪燭聽寒雨話舊過夜半居然消百憂莞爾成一粲維子才且賢文采甚煥爛起從有道徵國光方縱觀謂宜真館閣鴻猷藉宣贊如何奉明命鈞考親吏案黎庶乃邦本疾痛資抑按要將遠猶敷可以小邑翫心懷簡書畏跡逐萍梗散席挂遇順風潮生失遠岸昨夕簪云盍今朝袂還判後會復何時臨岐重嗟歎

周伯寧春晴江岫圖

尚書襟懷絕瀟灑揮毫往往凌董馬平生一筆頗自珍數尺新圖為君寫齊山遙接吳山青碧波萬頃孤帆征東風綠遍汀洲草總是岐亭離別情一向江南一江北

離情浩蕩嗟何極正如江上之碧波縱有并刀那前得
當時已足令心愁如今况復隔羅浮掩圖却上高臺望
但見遠海連天流暮歸朝出誰與侶蜃霧蠻煙結悽楚
木棉花落鸚鵡飛苦竹叢深鷓鴣語

絕句

落葉滿衡門蕭蕭風雨夕一燈溪上明何處獨歸客

唐 肅 六首

肅字處敬會稽人元末官嘉興儒學正洪武初
名修禮樂書擢應奉翰林文字兼國史院編修
以疾失朝罷歸里謫佃濠卒有丹崖集 戴叔能云處敬詩文

澹而華質而麗直而不倨簡而不吝 蘇平仲云應奉律詩步驟盛唐 顧玄言云翰林思頗清僻

明詩綜卷四

詩話處敬文極為危太樸宋景濂戴叔能申居子迪所許詩與謝僉事
原功齊名稱會稽二肅其為學正也盡挈其家居樵李徐幼文送以詩
云路出三江外程滄一日間萬季迪詩云舟重全家去詩多一路題處
敬亦有留別詩存丹崖集中當元之季浙西咸有詩社而樸市濮仲溫
豐於貲集一時名士為聚桂文會以卷赴者五百人請楊廉夫評其優
劣於是紀風土者目為樂郊及揚完者亂州無完郭然總同知思恭德
謙猶招羣芟集南湖與會分韻者一十有四人是時聞人麟彥昭葉廣居居仲金
復集諸公於景德寺亦一十有四人吳鎮仲圭居魏塘貝瓊廷琚居
銅子尚藩著澤民劉堪子輿咸有詩名吳鎮仲圭居魏塘貝瓊廷琚居
千金圩鮑恂仲孚居郡城之西溪郁遵子路居商陳村四方避地者溫
州陳秀民庶子居竹鄰巷閩人卓成大器之居甌川江陰孫作大雅居
南湖崑山顧德輝仲瑛居合溪天台徐一夔大章居白苧里會稽江漢
平宗居濮院桐廬姚喬壽樂年居海鹽之峨溪而居南高澤志士敬東
居四明周業以陸宣公書院山長留居黎林日以文酒唱酬詩成輒錢
板鏡鮮聞者傳為勝事今也流風遺俗未有存者錄處敬詩因附及之
欲尋舊蹟不勝海
乘岸谷之感也

銅井迎送龍辭 二首

伐鼓子吹簫迎我龍兮山椒龍之都子何所泉淵淵子

石爲戶叩龍車子乞靈龍不出子我心若醒我心若醒
子龍寧勿聆

我叩龍行龍卹風旋波子龍出龍之出子福子變旱煤
子爲澍龍爲澍兮我弗饑返山椒兮雲旗風冷然兮龍

歸

題張孟兼所注謝翱西臺慟哭記後有序

謝翱字皋羽文丞相館客丞相既薨皋羽哭之

於子陵釣臺作慟哭記今金華張子爲之解云

宮中六更初罷鼓藍田洗玉沉厓浦廬陵忠肝一斗血

去作燕然山下土桐江水落秋日頽有客歌上巖光臺

石根敲斷鐵如意萬里北魂招不來西風又涸灤河水

明詩綜卷四

故老寥寥知有幾珍重睢陽季葉孫箋簡能禪兩朝史

過清流關呈同行者關在滁州即宋太祖以周師擒南唐將皇甫暉姚鳳之地

前月與君南入關五更月出山霧寒行人畏露復畏虎

十五五同躋攀今日與君仍北去赤日黃塵汗如雨

息肩共憩石浮圖欲喚天風便高舉當時宋祖百萬兵

擒暉戮鳳關險平百年戰爭幾人守空餘蔓草啼鶻鼯

關南遙遙白雲遠關北茫茫盡平坂回頭野燒起荒田

驅車度關愁日晚

題趙仲庸所画滾塵馬

匹馬滾塵誰所寫天水王孫最文雅王孫系宋不系唐

那識唐人與唐馬左輔白沙白于雪四十萬頭名各別

殿中此馬帝常騎一色紫霞名叱撥奚官似隸王毛仲
左手執刷右持鞚沙平草暖不被鞍芻豆飽來筋力縱
翻身倒豎踣鐵蹄霧尾風駿亂不齊元是滇池赤龍種
猶思躍浪涌春泥太平無事征戰少青絲絡頭可終老
不似交河赴敵時夜蹴層冰僵欲倒

抵瓜洲

春雨春潮撼客懷舟中十日九陰霾江名天塹元通蜀
地入瓜洲始接淮我笑銀杯能羽化君看寶劍或塵薶
明朝又過揚州去無復瓊花舊觀牌

韓守益一首

守益字仲修石首人明初以儒士攝教宜都擢

明詩綜卷四

三

廣西按察僉事入為河南道御史改春坊中允

有樗壽藁

詩話中允無詩名七言如幽禽曉聚岸花動錦鯉春肥溪水溫柳葉雨
晴鷓鴣語木棉風暖鷓鴣飛隔簾花影散棠棣何處鳥聲啼栗留具云
致風

過九江

夷險休渝節勤勞莫問家暮船維柳樹春水泛桃花盧
阜依霄漢江州對渚沙多情白司馬曾此賦琵琶

申屠衡一首

衡字仲權大梁人徙居長洲洪武三年徵至京
草諭蜀文稱旨授翰林院修撰謫徙濠有叩角

集

青瑣春閒漏點稀
博山香暖翠煙微
隔簾誰撼金鈴響
知是花間燕子歸

江漢一首

漢字朝宗會稽人徙居嘉興洪武初以文學徵
仕翰林院編修

題破窗風雨圖

若有人兮青雲衣佩玉玦兮光陸離爰處兮爰居左琴
劍兮右圖書輕富貴兮浮雲保厥美兮天真山房子寥
落天冥冥兮雲漠漠雨瀟瀟兮風夜作心耿耿兮不寐
紛遑遑兮求索彼薄夫子貪婪惟聲色兮是耽文繡兮

明詩綜卷四

五

膏梁蓀何為兮懷慙秋蘭兮可紉吾所思兮古人寒檠
兮雪案甘與君子相親

趙傲一首

傲字本初紹興人元鄉貢進士明初官翰林侍
制

續蘭亭會補叅軍孔盛詩

暄風播曠宇欣懷託陽春
盥袂寄幽暢虛襟遺世塵
擷芳遵丘阿接杯沿澗濱
詠歸何逍遙遐哉仰斯人

詩話詩不見佳取
其有晉人遺韻

桂彥良一首

彥良名德稱以字行慈溪人洪武初待詔公車

以白衣賜宴除太子正字尋為晉府右傅改長

史追贈編修謚敬裕

烏繼善云先生詩文在鄉里曰清節集在京師曰清溪集春和詠言為王傅時

曰山西集為長史時曰壯集集還鄉後曰老拙集又有和陶詩中郡紀行皆不在集中其字句雖刻削點綴自令人稱道不已

詩話長史以德望重韻語非其所長然如巴園五月收丹橘丙穴三春饌白魚亦小有風致吳江史明古為作傳稱學校嘗咏科斗池上看科斗分明古篆文命長史續之應聲曰惟因戴水底秦火不能焚可稱敏絕

和陶

我生雖阨窮牆屋亦苟完集芳被荷衣隱居思鷓冠素
無怨懟心安有憂戚顏明月照溪堂清風隱柴關螺杯
偶獨酌焦尾時一彈悠悠五噫歌遠懷梁伯鸞庭前種
梧竹清秋共高寒

王鏞

明詩錄卷四

七五

鏞嘉興人洪武庚戌舉人翰林院編修

詩話予年十七避兵練浦歲己丑崔符四起乃移家梅會里里在大彭嘉會二都之間市名王店或曰石管時鎮過使遠居此故名或曰宋尚書居正之宅或曰元學士景家於是或曰元學正綸也傳聞各異己亥十月訪蔣布衣之翹於射襄城蔣語余曰子知王店之所由名乎洪武中孝廉鏞及弟鈞之所居也因出所輯樵李詩乘則二王詩俱在焉并出二王合刊詩彙舊本共一冊燈下讀未竟客至轟飲而罷甲辰四月再過之不值又數年而蔣逝無子遺書盡失可歎也後見水竹居詩一卷中載二王題咏各一首因亟錄之水竹居者處士朱克恭之宅距語兒鄉東六十里地曰澄林當時郡人馬盛為記貝瓊為志題詩者二王而外有金天藻陳麟陳熊陳振孫詢能詩云到門碧色帶初雨滿地綠陰遮暮天振詩云玉簫吹徹天如水釣艇歸來月滿村釣詩云候門童子低於鶴留客軒窗小似船能為清江弟子見清江游汲山記詢府志有二人一分宜丞一汀州知府餘皆不得而詳矣梅會一作梅匯水曰梅溪鏞詩所云吾家舊在梅溪上是也梁孟敬石門集有題嘉興王氏梅花莊詩未審即是二王所居否因錄鏞詩附志於此

水竹居為朱克恭賦

碧水澄潭自竹洲琅玕多種屋東頭旋燒新筍安茶竈

時祈嘉魚躍釣舟客至罷邀明月飲人間何必五湖遊
吾家舊在梅溪上遙憶清風度早秋

劉 紹 五首

紹字子憲後以字行建昌新城人

明音類選
作吉安人

洪武

中官翰林應奉詩載元音遺響

詩話子憲與盱江胡布子申張達季兄為郡人張烈光啟胡福元澤類
編其詩號元音遺響度其初三人皆不仕于明者而府志載紹於洪武
中官翰林應奉文字後以國子助教致仕則不得謂之元音矣登道山
亭五言遺響不錄考子申詩序云僕與子憲為世姻家曩俱客閩師不
克所志斯蓋客閩時作子申又為紹作山居十詠其三曰仙臺山則在
新城縣西南三十里而元澤編子憲詩題曰黎川劉紹然則紹非吉安
人蓋
矣

秋懷 三首

緬俗結紆軫易初吾弗為臨流采香薄日與佳人期舉

明詩綜卷四

三六

世厭芳草薰藉以同施撫襟悵予懷策駕臨海涯聞有
魯連子千金棄如遺高情儻可起攜手斯與歸

大化日旋運曦娥去悠悠俛仰宇宙間身命誰能留迷
復肯在己不耕寧有秋雞鳴起為善思與大德儔朝露
竟幾何悵然日增憂

陰陽鼓橐籥日月如轉丸官神化運誰能測其端春
暘美萬物秋露淒以寒乘時變榮悴天道終可言

邯鄲

訪古墓英俠壯游過邯鄲連山飛翠來馬首如揚瀾貫
酒呼美人浩歌弔平原憶昔致多士儲才濟時艱賓筵
粲珠璣簫鼓清夜闌蹇我匪脫穎懷賢邀難攀干戈浩

縱橫長路方漫漫感激詎有已登車摧肺腑

登道山亭

名藩跨炎服崇阜極幽爽亭臺納元氣磅礴俯深廣我
來屬初霽心與孤雲往蕭颯海樹秋如聞暮潮響摩挲
石闌古揮霍霄漢上大有本空虛河山一溟漲淒涼乘
槎意迢遞紫霞想濁世誰復然臨風默惆悵

林公慶一首

松江新舊府志失書公字

慶字孟善處州人明初官翰林出為

松江知府

詩話孟善守松江葬三高士于予山東麓見魏文靖集而願
東江作府志官籍民間皆關焉不詳後來者更不足責矣

長沙

明詩綜卷四

三

岳麓道林何處是郡人遙指水西邨儒官佛寺俱無迹
竹樹如麻暮雨昏

明詩綜卷四

小長蘆 朱彝尊 錄

歙州 汪與圖 緝評

趙 訪一首

訪字子常休寧人隱居東山元季輔元帥汪同起兵保鄉井授江南行樞密院都事丙申內附

洪武二年名修元史書成不願仕還有東山集

汪仲魯云子常詩因感發而形之詠歌雖不專乎是然長篇短哦亦不一字苟為也 詹烜云先生詩五言初學六朝後改習建安諸子及老杜近體則學唐人

靜志居詩話東山環谷二先生俱以經學重尤研精春秋環谷守康侯之說東山學於黃楚望首開夏時冠周月之非不相雷同故陳敬初贈詩云君之博洽漢馬融春秋三傳以例通百源雖異委則同二先生於吟詠均非所長趙差勝汪趙集歲久淪闕其裔孫吉士視權揚州錢版

明詩綜卷五

以傳

與葉宗茂遊山村

村北村南春事幽故人亂後得相求倉皇屢作經年別
邂逅能無一日留丁令歸時空有恨虞卿窮久不須愁
卜居共愛清溪好先向沙邊具小舟

汪克寬一首

克寬字德輔一字仲裕祁門人隱居環谷教授

洪武初召修元史書成固辭不仕有環谷集

人云環谷七言古詩在長吉子瞻之間

哀鄒山處士

大化無私兮猶埏埴之陶鈞跖何命之長兮回何命之

屯嗟哉斯人兮樸以醇夫何災疾兮四體不仁越星周而弗廖兮重子姓之悲辛丹青彷彿兮迥然笑擲魂胡不歸兮鄒山垠

陳基 二十一首

基字敬初臨海人仕元為經筵檢討歸值用兵開行樞密府起為都事轉江浙行省郎中參張士信軍事尋參太尉府軍事遷學士院學士吳平名修元史賜金而還有夷白齋橐

顧仲瑛云敬初古文詩章同輩

錐極力追之不能及

敬初在藩府飛書走檄皆出其手敵國分爭語多指斥吳亡之後其臣多見誅戮而敬初以廉謹得免今所傳夷白齋集指斥之詞儼然臚列後人亦不加塗竄太祖之容敬初何嘗魏武之不殺陳琳乎

詩話敬初家臨海丹丘之麓其在吳結小丹丘藪叔能為作記其詩亦叔能所編顧仲瑛輯前後交友詩為玉山雅集柯敬初以下即次以敬

明詩綜卷五

初詩謂同輩極力追之不及蓋當時之月旦然矣

山高寄陸玄素

謂山高兮其上有天謂地厚兮其下有泉天不可升兮地不可極我思古人兮為之太息古之人兮謂誰山之中兮水之澹孤舟兮容與俯狎步兵兮仰招鷗夷非夫人兮爾曷從之

雞鳧行

雞與鳧皆齷育鳧愛水遊雞愛陸鳧昔木辨雌與雄毋不顧之雞為伏雞渴不飲飢不啄以腹抱卵誰敢觸鳧脫齷雞鼓翼日日庭中求黍稷州州呼鳧使之食鳧羽日離襪一朝下水不顧雞雞在岸鳧在水賦性本殊徒

爾耳雞知爲母不知鳧恨不隨波共生死

刈草行

原上秋風吹百草半青半黃色枯槁城頭日出光杲杲
腰鎌曉踏城門道門頭草多露未晞爾鎌利鈍爾自知
一人刈草一馬肥馬不肥兮人受笞城中官廩三萬匹
一匹日餐禾一石

秋懷二首

羣動夜已息秋聲適何從仰視天宇高微雲浩無蹤明
月在庭戶河漢上縱橫旣莫知所始何由究其終我獨
絃我琴微風入疎桐寫作清商調感慨無窮

我有一樽酒獨酌不成歡豈無骨肉親悠悠隔河山亦

明詩綜卷五

三

有平生友合并良獨難古人千載上世遠不可攀何如
與明月徘徊松桂間月旣知愛我流輝照衰顏我亦知
愛月託心同歲寒長願玉宇淨河漢生微瀾此月不可
負此樽不可乾天地等逆旅流年若驚湍古人雖云遠
其言美芝蘭舉觴以和之對月長盤桓

待王子充未至

屏跡遠城闕幽棲向林阿永懷同心友褰衣起婆娑安憶
昨走京邑彌年阻關河結客燕趙間頗覺增悲歌逸驥
謝羈紲冥鴻辭網羅所念聖哲遠中心良匪他夏屋蔭
嘉木芳池發新荷須君此弭節日夕共委蛇

夏日喜友見訪

兀兀少寤語悠悠多遠懷斂跡昉僧夏凝神企心齋美
人忽至止良友與之偕闕其類逃虛登爾覲所諧跡邇
志彌愜情敦禮無乖衣褐貴懷璧屬辭慚類排積雨霽
初夕清飈掃餘霾願言念幽獨日此憩朋儕

通州

渡江潮始平入港濤已落泊舟狼山下遠望通州郭前
行二舍餘四野何漠漠近郭三五家慘澹帶藜藿到州
日亭午餘暑秋更虐市井復喧譟民風雜南朔地雖江
淮裔俗有魚鹽樂如何墟里間生事復蕭索原隰廢不
治城邑僅可託良由兵興久羽檄日交錯水陸輓粟芻
舟車互聯絡生者負戈死棄溝壑雖有老弱存不
克窮錢鏹我軍實王師耕戰竝宜作惟仁能養民惟善
能去惡上官非不明下吏或罔覺每視理亂原媿乏匡
濟略撫時一興慨悲風動寥廓

海安

淮海水為利轉運有常程積渠如積金守防如守城邇
聞渠隄壞水決如建瓴我軍賴神速侈力障頽傾舊防
幸已復新畚亦宜興古人慎舉衆日費千金并尅敵務
克糧足邊資力耕矧茲淮甸間沃野富吳荊艸萊日加
闢餽餉歲彌增勿使土遺利坐令儲峙贏東南力可舒
根本丁非輕欲弘中興治斯事力當行陋儒無長算觸
事有深情冉冉趨畏塗戚戚慎宵征

吳陵古名邦利盡揚州域舊城雖丘墟新城如鐵石昔
爲魚鹽聚今爲用武國地經百戰餘士恥一夫敵征人
還舊鄉下馬問親戚躡躅慨蒿藜徘徊認阡陌桓桓霍
將軍出入光百辟位重言益卑功高志彌抑誓欲報仇
讎不肯懷第宅人羨到家榮驚喜爭太息白日照旌旗
閭里有顏色皓首太玄經雖勤有何益

上樂

夕次泰州郭朝行上樂里密雨灑蒹葭秋風拂菘米頗
聞承平日魚鹽賤如水簫鼓樂叢祠謳歌動城市中
原正格鬪擊柝聞四鄙官道日暮無生人得螻螳依依煙
際舟兩兩舟中子來往賣魚鰕出入官軍裏生長離亂
間不識紉與綺失喜見王師被服多華侈買物不計錢
僕僕更拜起何當罷戰伐萬國收戎壘山河歸礪帶車
書復文軌有地盡蠶桑無人不冠履腐儒亦何需歸山
守枌梓擊壤樂餘年此樂無窮已

令丁鎮

水路由下樂前赴令丁鎮落日淡平蕪荒村帶寒燐曩
時富魚稻稅薄民不困蓮芡每時豐亦足備饑饉江湖
歲或艱老弱行蠢蠢相攜就淮食不得辭遠近四野今
盡荒百畝無一畷鞠爲鳧鴈區無復限封畛師行輜重
隨士飽筋力奮經費固有常變通亦宜論吾聞古賢將

羊陸聞吳晉食足邊備多高標邈千仞

務子角

頻歲事行邁敢云筋力衰官軍渡淮海父老迓旌旗騎
士盡驅虎舟師皆水犀踴躍趨敵場謳歌雜華夷行行
務子角所過悉瘡痍草木未黃落風露已淒其僕夫跼
謂我歲暮寒無衣故鄉日以遠道路實嘔崎我方戒徒
侶師行有成期貴賤皆形役違敢恤其私賴有同袍彥
議論各瓌奇有酒即共飲聊復慰羈離

海安過牌得風出爛泥洪

舟過海安插路轉爛泥洪水行九十里決漭趨秦潼月
黑星漢高四顧無人蹤縱有百尺牌不如數尺篷是時

明詩綜卷五

六

天宇霽餘霞散晴空篙師無他術仰面呼南風夜來水
鳥鳴出沒西復東其聲類人嘔聞者思挽弓吾聞亦駭
異莫究吉與凶得非卑濕區窳池蚊蚋鍾暑夕啞人膚
蜂蠆尚可容此鳥號蚊母蚊吐利於蜂往往陂澤內雌
呼命其雄春氣一以和託巢蘆葦叢此鳥信可憎彼蚊
幸未逢所憂亡命徒持刃匿草中晝伏夜間伺為毒甚
斯蟲我方事師旅禁暴哀人窮此輩若不除厲民安有
終所過戒吏卒反覆開盲聾爾寔備官守責在兵與農
自古處邊圉盜賊商旅通陽德始發生人事宜肅雍簡
書雖有程我行憂慮從歎息行路難何由辭轉蓬

青絲絡馬頭送李彥章

青絲絡馬頭游宦古蘇州蘇州城東萬斛舟前年運米
直沽口送別江頭折楊柳承憑頭插上陽花錫宴尊傾
光祿酒江上今年楊柳黃碑書千里有輝光勇騎閩外
將軍馬飽食閩中荔子漿閩中女兒歌白苧把酒勸君
起為舞將軍好文不好武自古閩中稱樂土

送李景先錄判

閩門柳枝短君行不可緩贈君不折楊柳枝勸君飲此
金屈卮丈夫將身誓許國何用當歌傷別為青絲絡鞚
黃金勒游宦鄱陽山水國何處春風最憶君琵琶洲上
蘼蕪碧

十六日解維值北風大作復泊北門

明詩綜卷五

七

風急江難渡春寒雪更飄濟川雖有楫跨海恨無橋使
節辭吳近官軍去楚遙北門仍繫纜山雨夜蕭蕭

寄玉山

江上秋陰日漸多思君不見奈愁何風高澤國來鴻鴈
露下汀洲落芰荷公子文章裁重錦美人衣袖翦輕羅
画船亦欲溪頭去聽唱花間緩緩歌

婁江即事 郭義仲瞿惠夫秦文仲陸良貴兼寄

顧草堂

婁江江上樓居好滄海海頭城邑新蠻郎打鼓爭起柁
鮫客捧珠思售人風燈照夜不數點霧月湧波才一輪
浮生會合豈易得看劔引杯寧厭頻

陸氏別業

窈窕西池一徑通，亦闌如畫倚晴空。風微燕雀飛塵外，日皎龜魚在鏡中。入谷謾誇盤往復，卜鄰宜住讓西東。綠陰滿地新荷發，猶勝開樽勸碧筒。

題倪元鎮画

西池亭館帶芙蓉，雲水蒼茫一萬重。此日畫圖看不足，滿簾秋雨夢吳淞。

胡

翰

十九首

翰字仲申

一曰仲子

金華人國初以薦授衢州教授

名修元史成賜金帛遣歸有胡仲子集

宋景濂云先生出言

簡奧不煩而動中繩墨如夏圭商敦望而知其非今世物也。朱叔英云仲申五言古詩超然貫通雖潛深亦莫余及餘子何足道哉

明詩綜卷五

八

詩話明初浙東睦有徐舫詩派嗣有趙汝誠詩選越有求漁鍾秀集而金華承黃文獻看柳文肅買吳貞文萊諸公之後多以古文辭鳴顧詩非所好以詩論吾必以仲申為巨擘焉獨孤及之論曰五言之源生於國風廣於離騷著於蘇李盛於曹劉漢魏作者實有餘而文不足以今按昔則有朱紱疎越太羹遺味之歎誦仲申五言正猶路叢出於土鼓篆籀生於鳥跡庶幾哉升堂之步乎宜潛溪有學林老虎文淵鯨之目也

湘筠辭

湘之山兮西迤湘之水兮東驚何箇籟兮孔多望不極兮湘之浦帝子去兮雲中俾夫人兮延佇曾莫樹兮椒蘭又莫搴兮蘅杜載雨兮載陰滔滔乎誰與度將以遺予子琅玕抱幽貞兮永固

鬱鬱孤生桐

鬱鬱孤生桐託根鄒嶧顛皎皎白素絲出自岱畎間一

朝奉庭貢妙合良自然桐以為君琴絲以為君絃中含
希世音置君離別筵征馬慘不嘶僕夫跼當前君行千
里道豈惜一再彈南風日渺渺清商動山川和者昔已
寡聽者今亦難

人生苦偏側

人生苦偏側莫處蠻觸間殺機起不測朝夕相構患尺
書下齊城丸土封秦關用意何崎嶇舉世尚其賢湯泉
水長温蕭丘燄長寒天地有至性貧賤吾所安

擬古

四首

一夕復一夕一朝非一朝昨見春花開忽觀秋葉飄人
非金石姿安得長不彫窮年事觚翰駕言遠遊遨手提

明詩綜卷五

九

具櫛劒拂拭鷓鴣膏含精變光彩上薄青雲膏願君勿
棄置佩此長在腰南山有猛虎西江有長蛟斫蛟取猛
虎始貴非鉛刀

節節復促促雄鳴雌自續借問此何音有鳥人不畜三
文被身體五采爛盈目聲諧九成奏靈出衆羽族自從
阿閣傾再改岐山下千年不來儀四野多鰥贖世德誠
已微天路清且穆願因東南風吹度玉笙曲

千里不唾井與君相別難風塵_且異路恒願同悲歡在
金莫為玦在玉當為環聯以翠織成宛轉衣帶間相望
燕與越寸心良自堅日入已三商憂來翻百端遙遙託
清夢不知寒夜闌

日長自愛惜夜長復悽惻人生幾何時少壯已非昔涼
風動萬里起念南與北山川路杳杳車馬去不息燕趙
高聲名荆揚壯材力仲尼七十說未遇身削跡為雲不
上天焉能雨八極

示項生

去日不可追來日猶可期朝采六藝英夕玩忘其疲海
是衆水積聖亦塗人爲挾冊自有得焉用比臯夔

游仙詩

夙志慕仙術笑傲人間春朝陪瑤池宴暮揚滄海塵道
逢安期生遨遊乘采雲粲然啓玉齒遺我紫金文天地
此中畢世人不得聞受之今年留待逍遙君青鳥從
西來飛去扶桑津寄書久不到白首悲秦人

明詩綜卷五

十

卧龍岡觀賈秋壑故第

宋祚移東南會稽國內地白日照城郭相君開甲第蜿
蜒卧龍岡高出列雉背審曲立萬楹增雄踰九陛飛棋
凌丹霞交疏激清吹上極高明居下有幽深隧棲甲戒
不虞爲計亦已至以此忠社稷寧復憂隕墜揚揚昧所
圖擾擾復多制崦嵫日西薄祝栗風南厲魯港十萬師
聞鉦一聲潰木披本先蠹隄壞川如沛詩人謹厲階人
禍豈天意摩挲岡頭石零落重奎宇山川一何悠蒼莽
鴻飛外舊時賀老湖酒船總堪繫吾寧慕賢達聊以抒

長慨

河水趨山東四曠無險塞呂梁扼其衝凜若萬強敵水
勢與石鬪終古怒未息舟行齟齬間衆挽不餘力進始
踰跬步退忽落千尺長年起相語茲土神所職登祠奉
嘉薦拜跪陳下臆船頭勇牽纜檣表高挂席好風東南
來送我天北極叱馭誠足欽垂堂詎遑恤昔聞莊叟言
有山在離石懸水三十仞魚鼈皆辟易孰隕天地性遂
拯生民溺鴻飛九州野吾願觀禹迹

夜過梁山灤

日落梁山西遙望壽張邑洸河帶灤水百里無原隰葭
莢參差交舟楫窈窕入劃若厚土裂中含元氣濕浩蕩

明詩歸卷五

十一

無端倪飄風向帆集野闊天正昏過客如鳥急往時冠
帶地孰踵萑蒲習肆噬劇跳梁潛謀固坏蟄古云萃淵
藪豈不增快悒蛙鳴夜未休農事春告及渺焉江上懷
起向月中立

書黃賀州平蠻事後

荆楚縣百越襟帶極遐裔連山限車轍外薄海無際風
氣何紛厖羣蠢動相噬古雖郡縣置畫地出租稅負險
恒自固犬牙植形勢聚若蜂螳來散如鳥鼠逝堯仁不
能覆往往思一籬懸兵萬里外暴露蒙瘴癘亦有內齊
民誑誤混狂獬巢穴牢弗破根本先自殫天遺槃瓠種
出入民患害聖哲戒不虞窮討諒非計皇靈冒下土赫

赫火俱厲日月所出入有生盡懷狹實賀崎嶇間苞磔
久聯締遣吏得黃侯爲國開信誓王師不血刃緩頰下
椎髻列功奏天子璽書遠頒賚賜以大銀盃副之金帛
對嶺海數十城安得百其喙我聞范史言此屬非難制
力弱校弄薄非可羌戎例漢廷慎擇守祝良復誰繼侯
今鬚盡白侯心甚豈弟分符浙水上應念東人勤蠻徭
尚有知東人敢忘惠作詩期不隕庶以示來世

西村老人隱居

振轡起陳力投簪遂辭祿吾今見伊人逍遙在郊牧令
節春載陽芳辰日初旭鳥鳴高樹顛牛飲澗溪曲翳翳
桑柘陰藹藹來牟熟耰耔返故畝經過倏新躅高榻生
風涼練衣無暑溽披帙欣自悟臨觴復誰屬情真不肅
客意豁已忘俗列生談力命老氏貴止足

夜宿寶石精舍

出郭隨穉子薄暮投山扉葉落故園樹危柯風更悲勞
生各已息不知夜何其上人池閣中燈火深相依盈樽
豈無酒多病久不持啖我園中果飽我以豆糜出戶見
明月踏月褰裳衣悠悠故意長落落新知稀冉冉歲云
暮百爾慎所歸

京口紀行

大江風西來波濤一何浩我舟不得發徘徊越昏曉衡
運已朔易曜靈忽東杲早出南徐州草乾霜露少慘慘

沙塵飛軋軋車輪繞寒氣來薄人重裘僅如縞日高衆
鳥翔天末孤帆杳川流與岡勢合沓自回抱人生大塊
間孰能出其表勉為辛苦行益見顏色槁人言野多虎
前驅善相保顧非千金軀祇欲仗穹昊共子陳此情歸
來卧蓬島

南京遇蘇平仲編修

南州苦寒月雨雪久不霽風沙滿長道四顧心飛揚君
子有行役束書歸故鄉故鄉浙水上遠在天一方父母
及兄弟昔別今五霜我昨來自東音問不得將為言起
居好良足慰子腸巍巍帝王都濟濟人物場噦噦爭先
鳴翩翩迺高翔六館走相送如失孤鳳皇惜茲歲華晚
眷彼川路長卧聽吳門鐘歸共越人航上堂拜家慶兄
弟同樂康歡言酌春酒拜舞迎春陽願言千丈暉長照
百年觴

青霞洞三偕章三益僉事觀石枰

太未一為客倏忽三四齡常恐玄髮變未諧滄海情今
晨屬休暇文彥皆合并方舟濟沙步飛蓋指巖高青霞
天之表赤日午正亭息陰無擇木抱渴無藏冰寧知大
火維有此真福庭巨石跨千尺如梁架青冥深疑地肺
開洞見天光明玉樹交左右禽鳥無一聲涼風度澗水
炎濁蕩然清昔聞偶奕者坐隱交心兵相持勢方急翦
睨耽若醒柯爛胡不歸海枯固其恒蠻觸遞翻覆大化

何由傳不如飲美酒且置石間枰

送呂君采元史北乎

又見陳農去遙臨析木墟山川遊幸後文獻亂離餘備極傳聞異歸從直筆書百年殷監在盡獻玉階除

陶凱 二首

凱字中立天台人至正丁亥鄉薦洪武初召修元史除翰林應奉文字陞禮部尚書出為湖廣參政致仕復召為國子祭酒以參政致仕

詩話洪武元年帝既平定朔方金匱之書悉輸秘府冬十二月詔發所藏元十三朝寶錄纂修元史命宋濂王禕為總裁官徵山林遺逸之士凱與祁門汪克寬德輔金華胡翰仲申徐姚宋元禧無逢臨海陳基敬初休寧趙汙子常新淦曾魯得之淳安徐尊生大年鄭傳恕如心新喻趙堽伯友長洲謝徵元懿傳著則明高啓季迪寧波張文海及黃麓王鈞凡一十六人相傳龍溪林弼元凱亦與史局然余曾見內閣所儲林

明詩綜卷五

十四

登州集其序傳均未言其修史蓋林所修者禮書也至大年詩集有送操阮公刺還鄱陽作其一云宿德高年史局尊經旬病廢想丘園相期麟至方投筆忽報驅歌已在門幽谷使須從季愿空齋恨不聞何蕃芝山當戶青如舊笑把青巒入酒尊其二云汗牛何啻三千牘奕葉相兼二百年大史網羅無軼事諸生縣篋覘新編綠陰畫永毛錐健青瑣宵分蠟炬連千里揚帆東匯澤也應回首會丹鉛潛溪亦有送阮詩云帝曰元宥史是非高紛揉苟不亟刊修何以示悠久宜簡嚴大匠學識當不苛衮芥嚴義例執筆來聽受使者行四方持職盡蒐取非惟收謬髦最欲尊黃耆子時奉詔來君亦至鍾阜一見雙明眼不啻髮發赫大啓金匱藏一一共評割發凡及幽微勝辨白與黜奈何君有疾客邪千氣毋翩然賦式徵使我心中玻則琬實與編摩者宋元遠寄潛溪詩云當時十八士去留各有緣所云十八士者公善長表上一時克寬汙基元禧輩皆引歸不受爵仕者亦未盡通顯惟凱與魯位三九之列二公詩俱罕傳祭酒長歌特雄放可喜

長平戈頭歌

長安野人鑿地得古戈上有疑字歲久俱滅磨惜不能如豐城古劍射牛斗吁嗟戈乎奈爾何但見青銅凝寒

暮煙紫月黑山深夜飛雨恨血千年猶未銷荒郊夜夜啼冤鬼當年趙括輕秦人降卒秦坑化為土嗟哉趙亡秦亦亡落日荒城自今古摩挲爾戈一問之令人為爾生愁思何不以爾為鍾鐻何不以爾為鼎彝吁嗟戈乎徒爾悲爾今還當太平世人間銷兵鑄農器願壽吾皇千萬年終古不用戈與鉞

贈琴士施彥昭

君不見鳴琴無賞音伯牙絕絃仍破琴又不見斲琴無良工焦琴終為爨下桐大江之南多好山孤桐往往生其間武林城中百萬家斲琴施氏良足誇嗟哉施氏之外無復人桐樹枯死終為薪今人好尚與古異人間雅琴多棄置雅琴苦少秦箏多嗟哉施君將奈何

明詩綜卷五

十五

曾魯一首

魯字得之新淦人應召纂修元史編類禮書入儀曹為祠部主事超拜禮部侍郎以病乞歸道

卒有守約齋集

徐大年云南京有博學之士二人以吾魯筆者曾得之也以筆為吾者宋景濂也

詩話侍郎在史館潛溪稱其補苴罅漏功最多既為志墓又贊其像云當議禮而考文較損益於錙銖蓋其所長不在吟詠也詩稟失傳僅錄其送黃尊師還九宮山一首黃尊師者雙井人涪翁八世孫也弱冠以門資襲爵為固始尉患風痺棄官有神師號金花君者曰吾能療汝疾愈當為道士尊師許諾金花君以帛黏其膚灼灼之七日而起乃之興國九宮山為道士主欽天瑞慶官其徒千人太祖西平江漢尊師迎於鄂諸應對稱旨後八年召至南京命儀曹設燕享之及還侍郎及潛溪俱送以詩潛溪詩曰崔崔九宮山翠絳倚曾青飛觀時後先宸奎爛晶筵中有遊世翁霞衣佩惹珩仙徒一萬指執簡聽使今年來蓮兵焚散走如流星翁獨牽青牛尋雲自躬耕翠華幸江漢危從森幢旌俯伏黃鶴磯再拜陳中情天日下臨照管棠受餘榮今又奉璽書翩然覲神京大官給珍膳法酒雙玉餅祇因逢景蓮重際泰階平致使方外上恩寵

雷鴻靈一旦賦歸轍行裾逐雲輕自言當弱冠綠袍佐山城風露感未
疾離家煉黃寧藥然日月鼎符書龍虎經中氣昭象先玄隱極幼冥欲
期啓泥九鼎飛出孩嬰名花滿皇都春風語流鶯驚純陽一銷鑠重陰遂相乘余聞重自愧
顛毛類枯莖逐物向役役棲身亦箴箴幸有一寸丹能與萬化并何時
滴秋露相期注黃庭侍郎則賦長歌中間敘尊師本末頗詳山為真牧
張真君道靖鍊丹之所故詩有真牧之
子世莫儔之句其事不甚著故具書之

贈黃道士還九宮山

我家羣玉山南陬君居蒙頂最上頭相望欲識嗟無由
搖搖心若風中旂君從少年慕遠游摩斥八極隘九州
下視起滅如浮漚九宮山高明翠虬真牧之子世莫儔
君居其間業清修五十餘載無悔尤翠華昔駐鸚鵡洲
承恩名對黃鶴樓敷陳屢荷天語酬大官醉以白玉甌
去年弓旌復窈搜麻鞵徑入朝冕旒神皋繁麗不肯留

明詩綜卷五

七

還山日夜稽首求山中之人書遠郵雨餘黃獨苗新抽
琅玕芝草弄春柔不歸負此巖壑幽龍江送別情悠悠
鄉人歌作商聲謳

宋

禧四首

禧初名玄禧字无逸餘姚人學於楊維禎洪武

初徵修元史有庸菴集

詩話无逸有盛名詩見於選本絕少予購得其集句如欲雪未雪雲葉
暗似暮非暮風花寒隔河雞犬春聲急繞屋田園豆葉肥九歲兒郎能
負米半生客路未歸田當時未覺青山好此日重來白髮多臘月雨連
元日雨故鄉人作客居人借人几榻開漁舍送客壺觴出酒家秉燭山
林連夜宿思家道路幾人歸驚心世事三年後照眼梅花二月初且復
殺雞留宿客未須笑藥入青山空中書寄仙人鶴月下詩成佛寺鐘臘
雪已消三尺盡春潮初送一舟行試看墨本打碑賣勝謁朱門冒雪歸
十年看山坐西閣一春多雨怕東風惡客不來成好夢大兵已過定豐
年南山種樹人猶在東閣看花客再來勝地江山兵後見高天風雨客
邊聞青春誰解看花去白髮真成秉燭游身到名山頭已白眼明秋日

葉初紅惜春幾度行元醜載酒先期過
絕眼中無梅梁水涸魚龍遠麥隴沙乾鴈鴛稀人日晝陰開晚照老年
寒極愛春風艱難人事都非畫賤交情倍覺真黃葉又經秋夜雨青
鞵曾踏歲寒冰南山臘雪新年在東浦春潮昨夜來樹繞石頭知客路
巖迴谷口見人煙鐘聲曾聽孤舟夜詩卷今題落葉時二月江村三日
雪百花時序半春陰對法流轉頭繞自然之趣其奇景濂學士詩云修
史與未役乏才媿羣賢強述外國傳荒疎僅成篇別
自高麗傳以下悉无逸子筆覽元史者所當知也

看雲樓

孤雲何處來相對纔咫尺隨風出山去青天忽無跡往
來固無心幽人候朝夕高樓為徘徊無使長相憶

送友人

老去復相見別來今幾年窮鄉君再到多病我堪憐渡
水山雲薄當樓海月圓客邊愁送客頭白聽啼鶻

次韻徐性全同宿小山陳氏書樓有作

明詩綜卷五

十七

出郭天猶暖登山興獨深雨餘初衣褐秋盡未聞砧黃
葉經過處青燈故舊心客樓頻對榻倡和有清吟

四月十三日偕岑宗昭胡斯美及其徒弟斯敏游
宿竹山精舍明日題詩於壁而還

龍潭橋西山谷中茅屋住者皆樵農兵前送官大木盡
春後斲筍高峰重同行何人黑漆髮精舍有佛黃金容
三更月明五更雨子規來叫門前松

徐尊生

二十一首

尊生字大年淳安人召修元史授翰林應奉文
字有懷歸橐

詩話大年詩格清老譬諸画手絕無鉛粉之飾顧諸選家多不甄錄何
也其懷歸集中有授翰林應奉詩云布衣昨日孤寒士翰苑今朝已授

管幼有文章澹滯久老無筋力進趨難隨班香案官展管筆列坐宮門午
賜餐早晚歸休宜引分免教白髮點金鑿則當日業通籍矣又呈崔尚
書五古則禮部尚書亮也大年雖自引求去而省臣留之續修庚申君
史又編集禮樂書迨三年九月大明集禮書成乃始得歸故歸舟詩云
兩年留滯帝王州也至六年九月詔編日曆復與纂修之列又固辭還
山拂帝意出為陝西教授未行而卒
制不就
誤矣
引睦州志謂曾授翰林侍

挂劍臺同楊廉夫作

荒臺多悲風下馬弔古人
古人重意氣今人亦露巾
湛盧化為土意氣千古存
顧瞻四鄰交朝盟暮仇冤孰持
不言諾慰此泉下魂
古人不可見今人難重論

朱太守祠

太守得意日五十當行年
余年適復爾出山良自憐
東風過荒祠下車一慨然
浮名亦何有千載隨飛煙
富貴

明詩歸卷五

十八

非所願夢想東臬田

題番陽蔡淵仲散木菴

蒙莊古達士涉世熟憂患
著書雖寓言垂戒非誕謾
有生勿為材祇以身試難
杞梓堪棟梁何曾保枝榦
彼樗乃散木匠石眼不看
終然老山林長將櫟為伴
年壽齊古椿傲睨寒暑換
青黃亦所天豈異溝中斷
一篇三致意懇懇義相貫
淺窺勿深求千載付浩歎
就中一轉語妙處最宜玩
既全曳尾龜復殺不鳴鴈
萬事貴無心倚伏味前算
材與不材間至理須剖判
舉似散菴人笑齒為余粲

愚生何所長有若木材樹臃腫復拳曲蒙莊匪虛語大
患緣有身過客棲逆旅常懷溝壑憂寧軫經濟慮分廿
老山林誰復歎遲暮州司忽見臨驅迫出蓬戶欲行勢
倉皇不行恐遭怒束書竟登塗妻子那暇顧史筆豈所
堪努力強枝拄未免取謫譏何從得衰子金幣落九天
深慙聖恩誤陞辭許還山老不任馳騫硯田久已荒尚
可不歸去况子燕雀姿難遙駕鷺羽樊籠久飼養反是
損天賦自秋俄及冬懶款曾屢訴情急鳴聲哀何啻啼
嬰孺恭惟及物心四海仰霖雨便期副所禱俾遂屏幽
素江頭買歸舟凌晨首先路

游上善觀

明詩綜卷五

七

波綠新安江草青賀齊城出城偕逸侶涉江暮春行舟
維古岸迴徑轉深谷寸琳宮恣幽討從容振塵纓花砌
藹微馥松房颯幽聲偶值苓箬翁手挈溪螺盈餉因觀
主厚味許騷人并以絃雅趣愜彌使吾懷清杯觴竟綢
繆詩筆亦縱橫浮生此暫聚忽散如煙輕遠送何依依
顧慙方外情

佩刀行

有序

金華之永康有山曰雲巖拔起天半有巨舟藏
壑中舟尾翹出如薑一釘墜巖下野僧得之以
遺張君孟兼製為佩刀鈿利特甚尊生為作歌
神人藏舟半天裏絕壁哈呀露舟尾錚然有物墮中宵

八觚峻增長尺咫野僧拾之歸張公化爲天矯蒼精龍
不知何世何年闕奇氣剽犀斷虎一旦生神通魑魅却
走妖邪空張公佩到蓬萊殿天上神仙驚未見青絲纒
懸白玉環當晝孤光搖冷雷爲君淬厲向盤根縱有青
萍何足羨他年辭榮歸浙山莫行金華赤松間精靈感
會起霹靂便恐飛去無時還

送宋君諤還明州

勞勞亭邊楊柳青新裁白紵歸衫輕我情頓似楊柳亂
君意已逐浮雲行一日相逢尚難別何況同居兩三月
君歸未久我亦歸歸家莫遣音塵稀

松江陸氏耕隱軒

明詩綜卷五

二

吳下陸龜蒙超然太古風圩邊施蟹斲澤畔築牛宮香
稻三千頃高堂八十翁隱名逃不得傳過大江東

游鍾山過寶珠峰頂西軒贈浙僧慈隱

寶珠峰頂危亭角邂逅高僧失垢氛便啓軒窗臨絕壁
還留賓客坐層雲簷端優鉢千香樹肘後楞伽幾卷文
謾說空門無繫著也須攜手惜輕分

送田無禽任太原同知

無禽家世齊諸田學術乃自余忠宣迢迢之官太原郡
戀戀回首京都天三河從昔產豪傑貳守得子稱才賢
當筵不作慘別意一杯泛以黃花妍

婺源汪氏樵隱

芙蓉高嶺含清暉宣平之居近翠微斧斤丁鐸冒林薄
雲霧滄滄露人衣石碁盤邊莫閒坐樵風涇裏當早歸
歸來絕不到城市自是世人相識不

讀元史偶書

前朝實錄與修纂異聞可紀不可刪窮河直至星宿海
祭天遠在日月山笙名與隆雜鳳吹斧號劈正當龍顏
似茲前古殊未有偶吟一二資餘閒

詩話或問大年讀元史詩中語因疏其事於左黃河之源元潘學士昂
霄志之柯博士九思序之陶徵士宗儀述之世祖至元十七年諭抱封
使都實佩金虎符以行自河州寧河驛度殺馬關約五千里始抵其地
越歲乃還言河源在土蕃桑甘思西鄙有泉百餘沮洳散渙聚若列星
以故名火敦腦兒火敦譯言星宿也元史祭祀志憲宗即位之二年秋
八月始以冕服拜天於日月山王禱興龍笙頌序六管其管下植於置
帝所自作其制為管九十列為十五行每行縱列六管其管下植於置
中而價復鼓之以鞀自價足至管端約高五尺仍鑲版作鳳形繪以金

明詩綜卷五

采以圓管之三面約廣三尺加文飾焉凡大朝會則列諸軒陛之間與
衆樂並奏每用樂工二人以按管一以鼓鞀以達氣出聲以叶衆音而
樂之奏成矣輟耕錄云興隆笙在大明殿下其制植衆管於柔草以象
大飽土鼓二韋蒙按其管則篋鳴篋首為二孔雀笙鳴機動則應而舞
凡燕會之日此笙一鳴衆樂皆作笙止樂亦止劈正管以蒼水玉碾造
高二尺有奇廣半之自殷時流傳至今者朝會時一人執之立於陛下
酒海之側所以正以不正之意志雅堂雜鈔云宣和殿所藏殿玉鏡長
三尺三代之寶也後歸於金元史禮樂志元正受朝皇帝出閣侍儀使
引導劈正管中行至大明殿外劈正管立正門北向立俟兩官升御榻
斧退立於露階東故趙孟頫宮詞云天步將臨玉斧來葛邏祿迺
亦云千官鶴立五雲間玉斧參差擁画闌是也一器
白斧或曰錢按禮有朱干玉戚然則此即玉戚云爾

七 生日有感

客中生日近七夕老子行年當五旬夢寐不忘林壑趣
形模難作市朝身已甘素髮欺凌我祇怕緇塵染污人
歸去秣田秋正熟新醪爛醉甕頭春

稷下

春官承制促成書東觀遺編任卷舒草草便垂千載後
遲遲難俟百年餘淹中舊學文空在稷下諸生術本疎
浪說徐生善頌止懷鉛竊食媿何如

新年

江上年華與浪奔天涯心緒向誰論持竿本住桐廬岸
被褐偶來金馬門足躡風雲非老事鬢垂霜雪是愁痕
非苗薺葉添新綠昨夜東風入故園

春望

浩蕩波濤海一涯紛紛半陸起龍蛇鵲聲只帶中原恨
燕子還思舊主家不見昔年遊賞伴愁看滿地落來花
傷情宋玉愁何限目極遙天日又斜

明詩綜卷五

三

送博士錢子予還鄉

乞得成均老病身懸車更向鏡湖濱都人共羨楊司業
鄉友爭迎賀季真落絮繽紛攬別恨歸帆縹緲傷殘春
欲知後夜相思夢鳳闕西頭月色新

畫馬

白馬被朱羈牽來過御前憶曾何處見金水小橋邊

春山樵

共穿石徑踏春晴却向山腰分路行樹暗雲深莫相失
隔林遙認唱歌聲

春殘驟雨過蒼巒瀑流千尺響潺潺貪坐莓苔洗雙腳

上羊歸盡不知還

溪雲黯黯覆溪潭雲罅疎星見兩三
半夜不知何處雨遙看飛電閃淮南

謝

徽一首

徽字元懿長洲人以布衣召修元史除翰林編
修改吏部郎中辭歸復起國子助教卒于官有

蘭庭集

題宋復古鞏洛圖

青山鞏洛舊林園仿佛昇平古意存
雨外人歸秋葉浦煙中鳥下夕陽村
昔年題字宸光合宋思陵題簽今日披圖野

興繁風景西湖仍不異惟餘故老說中原

明詩綜卷五

三五

明詩綜卷五

小長蘆 朱彝尊 錄

柘湖 陸大業 緝評

朱右 三首

右字伯賢臨海人洪武三年召修元史六年修
自曆除翰林院編修七年修洪武正韻尋遷晉

府長史有白雲臺

張楠渠云伯賢感與當不在魏晉下郭公葵云伯賢廣琴操出人意表非徒擬而

作將歸操云九州博大子將子遂之聖人待天下之心也精蘭操云子如好修維我之求子如不好子我何鄉道在我躬安於命也龜山操云周公上天泰龜山何家國之治否實存乎其人也拘幽操云日月有明容光弗留輔相之蔽也岐山操云既有吾土毋戕吾民太王之志也履霜操云民生有知以順天賦天下之為父子者定矣殘形操云曰修爾躬自天之佑君子惟自修而已琴操作於韓子之後立言尤難世宜與古人並傳哉

明詩歸集卷六

一

靜志居詩話元史初成為期不過六月故極其牽率徐大年詩所云草
草便垂千載後遲遲難俟百年餘是已李善長羨進文亦云據十三朝
實錄之文成百餘年粗完之史於時以順帝三十六年事無實錄可徵
未為完書孝陵復詔儀曹分遣呂復張買歐陽佑黃鼎等一十二人分
行天下凡涉史事者令郡國上之及遣儒生危於等歷燕南北開局於
故國子監採訪文字請行中書官印封識達京師三節仍命烏木
王禕為總裁官續完元史纂修一十五人右與崇德貝瓊廷珩義烏朱
世廉伯清青田王廉希陽嘉定王舜常宗全華張丁孟兼河南高遜志
士敏江陰張宣濠仲當塗李汝宗茂吳張簡仲簡青城杜實彥正東平
李懋賢命寅殷弼而趙堦伯友仍與其列以是年七月竣事其牽率猶
如故也獨怪宋王諸公負一代重望即伯賢當日亦以理學文章自命
於春秋傳國語則有類編於戰國先生泰兩漢則有泰漢學於唐宋則
首定韓柳歐陽曾王三蘇文集於元則有文韻而於史則
則有歷代統紀要覽通鑑綱目考證其言曰凡民之欲足而止惟學不
可以足而止可謂有志者矣宜其在局討論精詳用成信史乃任其翰
蕪重複遂出宋金諸史之下何哉良由孝陵猜忌諸臣畏觸逆鱗表進
之書不復更其隻字但就庚申君事補綴與前編絕不相蒙致有一人
而作兩傳者史至此驚蟻蝶之不如矣白雲臺凡十卷予僅鈔得前五
卷止有琴操無詩其後五卷僅得內閣本一過眼恨未鈔成足本琴操
有郭公葵跋公葵吾鄉人唐虞敬詩云我昔居秀州友有徐一夔好為
古文章自矜少所推每論其鄉人屈指二三希云有善詩者郭姓字公
夔不習時所好刻意追古詞前後數百篇一一皆珠璣郭名秉心惜其

詩無一存
者可歎也

遣興

幽逕何偏側，蔓草没行路。此生苦不辰，出門畏多露。遲
回蒙山居，仿像商顏步。籍籍春花萎，冉冉芳年度。寄語
素心人，朱顏恐非故。

次韻荅白雲悅禪師

向來同覽赤城霞，山寺吟行石徑斜。來往風流成二老，
文章交好屬通家。平安屢問東橋竹，寄遠曾將小院花。
支遁肯酬南隴約，相期歲晚度年華。

春懷

船樓空闕望京華，蘆荻江楓岸岸花。山色漸濃昏霧薄，
水光遙動夕陽斜。故鄉鴻鴈書千里，遠浦牛羊屋數家。
邊塞柳營多苜蓿，石田徒憶舊桑麻。

朱世濂一首

世濂一名廉，字伯清，義烏人。明初薦授釣臺書
院山長。洪武三年，續修元史，被召史成，乞歸，復
與修日曆，除翰林院編修，遷楚府長史。

瀧湫和韻

竹外煙浮僧煮茶，草邊風暖鹿眠沙。青巖何處看山客，
瀑布巖前數落花。

張孟兼三首

孟兼名丁，以字行。浦江人，徵為國子學錄，與修

元史以太常丞出為山西按察司僉事遷山東
按察副使為吳印所訐論棄市有集

詩話孟兼與景濂同里景濂薦之朝伯溫待孝陵論一時文人謂宋濂
第一其次臣不敢多讓又其次孟兼也然負才傲物屢凌其鄉曲及請
假還縣令丞門謁奉牲酒孟兼坐受其拜不答麾酒却之具亦無禮甚
矣當其之官山西景濂以文容刑法之容鷲堂為之揚揚不知威風之難
狃狃之猖獗不如祥麟之容容刑法之容鷲堂為之揚揚不知威風之難
德則已苟有德焉又何檢任之不革其行孟兼蓋於此而留意哉景濂
可謂盡朋友相規之義矣卒之怙終不悛與吳印爭訐印兩上封事言
狀帝怒械至闕下命衛士捽髮搥之垂死論棄市詔印曰吾除爾害矣
善為之噫印一鍾山寺僧爾帝寵任之授室賜
金至為之復讎必期快其意而後已毋乃過與

漫興二首

詩話杜子美集有漫興五絕九首又七言云老去詩篇渾漫與春來花
鳥莫深愁渾漫與者言即景口占率意而作也其後蘇子瞻黃魯直揚
廷秀諸公皆襲用之押入語韻姜堯章詠蟋蟀詩云幽詩漫興與笑籬落
呼燈世間兒女段復之詞云詩句一春渾漫與紛紛紅紫俱塵土陰時
夫輟韻府羣玉亦采入語字韻中蓋自元以前無有讀作漫興者迨揚
廉夫作漫興七首妄謂學杜者必先得其情性語言而後可得其情性

明詩綜卷六

語言必自其漫興始而其弟子吳復見心從而傳會之注云漫興者老
杜在浣花溪之所作也漫興之為言蓋即眼前之景以為漫成之辭其
言語似押而未始不俊此杜體之最難學者自廉夫詩出而世之人遂
盡改杜集之舊易與為與矣首治其誤者張孟兼也存其詩特鈔其誤

梨花半開夜雨催無奈
李花如雪堆門外
美人不見來
東風楊柳吹千迴

青驄驕嘶金鞵銜美人
二月裁春衫
江頭麥秀青蘄蘄
西湖放船開錦帆

義門鄭仲舒先生得請歸浦江子於先生同里且
親故賦是詩情見乎辭矣

鄭公去年離北平
束書抱病來
南京城隅邂逅喜且驚
開顏握手言再生
自從南北屢構兵
日夜悵望鄉關情
幾回寄書鴈南征
中心搖搖若懸旌
苦遭喪亂百病嬰

客邊囊橐一旦傾此來四顧徒煢煢豈料吾子與合并
我時聞之涕泗橫况公素有文章名居官勝國職最清
經筵之擢轉庠黌及當玉署宦已成又為奉常典棗盛
人生際此自足榮但恨白髮已數莖懷哉屈子全忠貞
誼與日月同光晶願言夕餐秋菊英佩明月璫紉芷蘅
懸河之論春雷轟使翫觀者顏發頰索居半載留帝城
坐聽夜雨哦寒檠眼前倏忽時變更春風一見衰草萌
公家孝義好弟兄遣兒千里來遠迎乃今得請荷聖明
身若插羽乘風輕過門云別明遂行開船要趁蒸雨晴
夜久不寐視長庚長庚欲落鐘鼓鳴庭樹喔喔聞雞聲
蒯綈起舞冠絕纓公歸我愁絲亂縈亦有夢寐懷先塋

明詩綜卷六

如過吾父款柴荆為言恨不同趨程終當早晚乞歸耕

王彝二首

彝字常宗嘉定人以布衣召修元史賜金幣遣

還尋薦入翰林以母老乞歸洪武七年坐太守

魏觀事伏法有三近齋稟

詩話常宗自號鳩雉子學有淵源集中孔子廟學碑南門記鄉飲酒銘
文甚高潔時鐵崖以文雄東南傾動一世常宗獨作文賦一篇試之其
略曰天下所謂妖者狐而已矣俄而為女婦而世之男子惑焉則見其
黛綠朱白柔曼傾衍之容無乎不至雖然以為人也則非人為婦女
也則非婦女而有室家之道焉此狐之所以為妖也文者道之所在昌為
而妖哉浙之西言文者必曰楊先生子觀其文以淫詞譎語裂仁義反
名實濁亂先聖之道顧乃柔曼傾衍黛綠朱白奄然以自媚宜乎世之
為男子者之感之也子故曰會稽楊維禎之文狐也文妖也意狐之妖
至於殺人而文之妖往往後生小子羣趨而競習焉其足為斯文
禍非淺小也文而可妖哉妖固非文也世蓋有男子而弗惑者何憂焉
誦其文可謂獨立不懼者矣其為詩若神絃四曲露筋釀子篇尚冷鐵
崖派派而集外有題宋復古鞞洛圖六言云斜陽欲雨未雨別鏡歸人

幾人峰迴忽見月出穉子相迎澗瀆頗有摩詰文房遺韻又題宋徽宗畫百合圖云偶為美名圖百合不知南北已八分亦有思致

秋林高士圖

嵐峰半殘陽彩翠明林杪僧塢遠鐘微歸人下山少風
衫落葉響驚起棲煙鳥攜手願言還前邨月初皎

東歸有感

路斷江淮已足憂繇華猶自說蘇州萬人金甲城頭騎
十丈朱旗郡裏樓麋鹿昔遊何處草鴈鴻不似去年秋
忍將一掬東歸淚付與婁江入海流

張宣

十四首

宣字藻仲初名瑄江陰人洪武初與修元史擢翰林院編修既而謫濠道卒有青陽集

明詩綜卷六

五

詩話藻仲入翰林年未三十孝陵以小秀才呼之既奉詔歸娶邵亨貞女宋學士送之以詩所傳紅錦裁雲春真鴈紫簫吹月夜乘鸞是也及謫濠道卒以詩辭其父溝南先生端云出世再當為父子此心終不間幽明誦之使人心惻

孤鳳吟

梧桐生高岡枝葉苑成林上有孤飛鳳結巢在其陰毛
羽爛五采唳嗷鳴好音虞舜去已遠王風不可尋來儀
苟非時亦何異凡禽

九日偕張思廉楊孟載徐二岳登虎丘

招提憑崇岡石壁根空虛躋攀陟層巔歷覽壞劫餘清
商振穹昊爽氣棲平蕪雲消初旭吐木落遙峰孤幽潭
積水深脩綆斷轆轤劍光欲飛騰神物今有無空令弔
古人解笑英雄愚撫茲良辰及感我芳情紆長揖當塗

者永與山林俱

與慈邑諸公會宿茅甫生駐鶴樓得夜字

白水冒平田積陰過初夏風雨招友生琴尊相慰藉飛
梯倚孤撐連峰競迴迓晦冥巖壑變空翠林木亞疎煙
截山椒微月露天罅僧鐘隔遠寺漁父候歸舍鶴影渚
雲迷風聲澗泉罷投迹山水邦脫身紛俗駕久忘簪組
累不待休沐暇飲酣心為壯時危氣逾下佳會不再期
茲遊偶來乍雞鳴起營營莫忘永清夜

游四明山

野人放浪山水情小弄雲海游四明半空下見日光動
中夜起聽天雞鳴松風濤卷出萬壑耳邊無處無秋聲
綠蘿碧澗月欲上澹煙遠岫天低橫山中招隱者誰子
相看擬和游仙行山川奇絕境復清秀色可攬難為名
安得仙人衛叔卿身騎白鹿下來迎粲然一笑白雲裏
授我寶訣教長生

虞姬

楚歌四面秋聲起美人如花帳中死重瞳將軍蓋世雄
淚流暗逐烏江水妾身妾身何足數八千健兒棄如土
空留恨血漬平原碧草無風為誰舞

王昭君

却手為琵琶翻為琵琶馬上風裂宮中衣玉關將軍兵百萬
恨君枉殺丹青師穹廬夢斷悲笳曲淚眼朦朧漢宮燭

荒丘遺恨草離離猶帶千年土花綠

石門待謝雪坡不至

古戍人何在春程驛尚存驅雞啼上樹秣馬出前邨
白雨侵江郭青山對石門謝公游宿處清興與誰論

桐廬舟行

自在眠沙鳥參差上瀨船亂峰寒笛外疎雨暮鐘前
灘轉旋無路林深別有天羊裘懷隱者高節已千年

錫山道中

風起晚淒淒愁雲隨漸低近人山鬼泣當路竹雞啼
百里無煙火孤城只鼓鼙故園楓樹外歸夢遶梁谿

送胡季城之官陽朔

明詩綜卷六

七

桂林南望八千里陽朔郵程又在西峒峒皆為矜狘住
山山惟有鷓鴣啼天垂海國鄉關遠雪壓江城草樹低
恨不從君拜虞舜目窮閭闔意淒迷

得鄧南隱書時在廣西

風塵擾擾干戈際兩地俱為淪落人夢見亦憐風度好
書來翻遣別愁新桄榔葉暗蠻溪雨荔子花濃海嶠春
壯志幾回思奮迅出門誰慰白頭親

題冷起敬山亭

石滑巖前雨茶香樹杪風江山無限景都在一亭中

画梧石

鳴琴罷瑶席鶴夢清宵警涼月下前除照見梧桐影

送鄭希本還徽州

從親南國久為官話別江城歲欲闌三百灘聲流月色
青山多處是新安

張簡二首

簡字仲簡吳人初師張伯雨為黃冠元季兵亂
以母老歸養遂返巾服洪武初召修元史有白

羊山樵集

顧仲瑛云仲簡詩澹雅有陶韋風王
子充云仲簡詩溫麗清深有類韋柳

詩話饒介之分守吳中自號醉樵延諸文士作歌仲簡詩擅場居首坐
贈以黃金一餅高季迪白金三斤楊孟載一鎰今其詩載集中殊不見好
次韻張田秀才見寄

樹杪青蟲晴颺絲春城風物似年時貧餘許邁餐金法
閒有陶潛飲酒詩芳草青青連野闊征鴻歷歷度江遲

明詩綜卷六

長洲故苑煙花外千里懷人入夢思

游石湖治平寺用唐人許渾所題詩韻

湖上春雲挾雨來楞伽山木盡低摧吳王廢冢花如雪
猶自吹香上舞臺

瓊四十二首

瓊字廷琚一名闕字廷臣崇德人洪武初徵修
元史除國子助教遷中都國子助教有清江集

郡志載有貝瓊無貝闕許中麗光岳英華載貝闕廷臣無貝
瓊程慶琮聲文會選則貝闕貝瓊並列據陶九成輟耕錄載姚文公鑿

妓女事云嘉興貝闕有詩今真貝曲載在
清江集中則貝闕乃瓊之別名非兩人也

詩話姚文公燧為承旨時一日玉堂宴集聲妓畢奏有貝貝者操南音
公疑而問之泣對曰妾建寧人西山之苗裔也父司燒炭於濟寧坐盜

用縣官錢賣妾以償遂流落倡家公憫之遣使白丞相三寶奴為洛籍
且謂翰林屬官王棟杖華曰汝無妻以此姬配汝吾即其父也貴裝皆

出於公棟後官翰林待制廷珺為作真真曲以紀事感憤於時廷珺從
學於楊廉夫其言曰立言不在斷絕刻峭而平行為可觀不在荒唐險
怪而豐腴為可樂蓋學於楊而不阿所好者也其詩爽豁類汪宗整
麗似劉伯溫圓秀勝林子羽清空近袁景文風華亞高季迪朗淨過張
來儀餘縵愈孫付衍足以領袖一
時此非鄉曲之私天下之公言也

行路難

采玉于闐河問君勃律何時過采珠鮫人室問君百粵
何時出珠玉歲久同為塵君何重利不重身海有波缺
我楫山有石摧我輪行路難出門即羊腸何況萬里道
管叔危周公匡人仇魯叟尊有酒盤有壺鼓坎坎歌烏
烏海不可涉山不可徒路旁之人愛爾玉與珠行路難
我以為父安知非虎我以為兄安知非狼仰天悲歌泣
下露裳

明詩綜卷之

九

郊居

直木惡為輪疲馬思卷旆匡時既非才處約斯寡悔采
詩鑒興亡讀易明進退永懷嵇阮放甘與沮溺對

送潘時雍歸錢唐

海縣兵未息公子今何之酌君葡萄酒聽我白苧詞憶
昔來黃灣始為童子師連牀風雨夕秉燭聽新詩殷殷
金石聲真足解我顛同居石壁下斗柄倏三移脫略勢
利交所貴兩不疑久懷地主恩亦有尊鱸思束書向錢
唐磬折從此辭錢唐實都會西湖天下奇朱樓起相對
上有子蛾者樓前五陵子竝馬金鞭垂酒酣復張樂但
惜白日馳近者屬彫喪不及全盛時空山鳳皇去月黑

號狐貍春風吹行殿碧草生荒基何當從子游觀濤醉
鷗夷子實濟時具飛騰方在茲匠石旣已遇小大隨所
施從容宰相前奮舌論安危豈無一尺筮盜賊不足咎
天空羽毛急水涸舟楫遲臨歧更揮淚中年傷別離

荅客

竊祿非本性適彼南山阿藜藿日不充慷慨獨商歌有
客向我言與世同其波商君震七國季子傾三河區區
守章句白首成蹉跎念之為三歎所樂良已多潛魚駭
釣餌飛鳥愁網羅結駟非不榮違已當如何

春日宴滄州

并序

歲在著雍涪灘春三月一日筠谷高士合賓客

明詩綜卷六

十

序兄弟飲於滄州一曲平池湧翠高閣延青圓
景中天繁陰四合微颺遠激幽芳襲人清醪在
壺嘉肴旣旅懲蟋蟀之刺儉美伐木之求友終
宴忘疲遷坐復酌鳴葭間發協朱鳳之和和舞
袖雙回翩驚鴻之欲舉嗚呼蘭亭金谷會豈能
常滄海流沙兵猶未息懟神仙之無驗宜曠達
以為高用綴新篇以紀雅集詩曰

天闊無留雲山明洗新黛過從屬休暇置酒滄州會柔
萋綠堪藉雜英紅尚在累觴旣不辭秉燭還相對清彈
促哀響祕舞呈脩態蘭亭今已矣金谷徒增慨大化會
有終四時寧復貸厭厭夜無歸從人譏倒載

早春

山寒花尚遲雪霽江已綠懷新感游子吟節喧衆族且
同尊俎樂幸免章綬東更擬登前峰青郊可遊目

擬東野

破屋夜通月霜氣刀稜稜病骨不受寒卒歲仍無繒殘
燈吐復翳僵卧如凍蠅事業漸蒸沙文章空鏤冰已失
國士意頗為少年陵長歌獨慷慨坐俟東方升

四月十日兒子翔翻來鳳陽留一月遣歸因令早
營草堂爰山下為止息之所

老病不得歸獨處長戚戚二子江南來眼暗初未識生
常戒垂堂肌肉如雪白一月常塗間海風吹盡黑買酒

明詩綜卷六

十一

為相勞問荅向中夕迢迢漢陽簿春來斷消息阿宣在
母旁頗知工翰墨艱難且撥棄頓使沈憂釋所媿無定
居百歲半為客經營須及早尚愛龍湫僻况近讀書臺
雲銷四山碧泉深出丹砂地冷多琥珀既非世資庶
遂陶阮逸良辰戒僮僕息息又南北五月方鬱蒸日氣
成霞赤出入非所宜川陸慎所歷惜別豈無淚向汝難
再滴秋江有鱸魚當挂吳淞席

次韻鐵崖先生醉歌

先生愛酒稱酒仙清者為聖濁為賢清江三月百花合
江頭日坐流萍船左攜張好右李娟紫檀雙鳳鳴雞絃
傾家買酒且為樂老婦勿憂無酒錢白日西沒大東旋

秋霜入鏡何當玄蓬萊有路不可到祖龍已腐三重泉
何如快飲三萬日酒樓即起糟丘邊願持北斗挹東海
月落枕股樓頭眠

穆陵行

并序

至元中西僧楊璉真伽利宋諸陵寶玉因倡妖
言惑主盡發攢宮之在會稽者斷理宗頂骨爲
飲器璉敗歸內府九十年矣洪武二年正月詔
宣國公求之得於僧汝訥所乃命葬金陵聚寶
山石以表之予感而賦詩

六陵草沒迷萊西冬青花落陵上泥黑龍斷首作飲器
風雨空山魂夜啼當時直恐金棺腐鑿石通泉下深銅
一聲白鴈度江來寶氣竟逐妖僧去金屋猶思宮女侍
玉衣無復祠官護可憐持比月氏王寧飼烏鳶及狐兔
真人歛見起江東鐵馬九月踰崆峒百年枯骨却南返
雨花臺下開幽宮流螢夜飛石虎殿江頭白堦今不見
人間萬事安可知杜宇聲中淚如霰

已酉清明

白苧衣鮮紫騮馬清明酌酒梨花下馬蹄一去不復來
梨花又見清明開城南城北多新墓日落啼鴉滿高樹
有酒誰澆千歲魂子孫盡發濠州住主人更勸金叵羅
阿蠻起舞玲瓏歌生前不飲君如何

予避地千金圩屢游及史兩山酒酣興發賦詩一

首惜山中無賞音者姑錄以自娛云

神人夜割蓬萊股蒼然尚作青獅舞爰基得道此飛騰
煙火千家自成塢前年盜起官軍下存者如星纔四五
我來欲置讀書牀出入朱愁穿猛虎山寒月黑無人聲
夾道長松作風雨佩環何日歸公主泉下銅棺闕千古
石仆麒麟罷官守林宿鷓鴣聞鬼語苦耽勝槩惜殘年
共說當時悲老父錦繡池臺已零落田翁八十鉏新土
傷哉土俗如巫覡伏臘荒祠沸簫鼓祠旁鑿井深不枯
雲氣隨龍有時吐試上崔嵬望沃洲直將培塿齊天姥
春前野桃渾欲放雪盡黃精亦堪煮興來起挾李長庚
重賦琵琶雙玉女

明詩綜卷六

十三

郭忠恕出峽圖

巫峽何危哉夾拱如龍門禹治九州不得到此峽口水
作雷霆奔問汝江中人幾日三巴去我者五月銷古雪
灑瀕堆深虎須怒巫峽之險安可攀胡爲吳檣楚柁日
日來往乎其間高堂中有如花顏銀屏翠箔青春閒涉
此萬里道經年猶未還黃金不買死直欲高南山汝舟
非龍汝非虎龜鼉出沒饒蛟舞前者已脫後者號江神
無情天又雨石巉巖子利刃攢一葉宛轉行千盤觀此
魂魄悸豈待杜宇夜叫猿聲酸安得鑿之盡平土萬古
不識風波苦

送進士霖歸天台

赤城雲氣神仙家千樹萬樹蟠桃花十二樓臺起花外
石門水長通烏麻當時劉郎亦草草出山却憶山中好
莫信丹丘日月長玉人已共桃花老山空水流雲自飛
劉郎看花須早歸

題董源寒林重汀圖

天下畫師無董源學者紛紛工水石雲山萬里出巴陵
白首淮南見真蹟亂石平坡淨無土松根裂石蟠龍虎
偃蓋千年飽雪霜林深六月藏風雨江上邨墟何處入
浮空遠黛蛾眉溼漁人日暮各已歸小舟如鳧落潮急
我昔西清常看画南唐此本千金價坐移絕境在雲間
月出霜後啼後夜薄游未挂吳淞帆令我一夕思江南
安得買田築室幽絕境開窗日日分晴嵐

明詩綜卷六

齒

十月十三日過梧桐溼時官籍濮彥宅龐氏唐氏
自經感而賦之

天寒水清石齒齒杏葉初黃豆花紫舞榭歌臺不見人
頭白烏啼月明裏當時豪俠輕五侯一榮一枯八十秋
綠珠亦解死金谷草露作淚無時流

冬夜

歲月悲游子風塵老腐儒兵交連北冀客隱向東吳草
白秦皇道天清陸瑁湖昔時尋樂處撫事一長吁

排悶

白首尚為客飄飄天一涯耳鳴通夜雨眼暗隔年花畏

酒從今斷題詩浪自誇有邨如粟里準擬便移家

夜泊武塘

風帆如健馬一日過嘉興水鳥如相喚秋蚊尚可憎
照人明月近接地白河澄耿耿渾無寐中宵對玉繩

橫港

南行入橫港茅屋到林丘落日猶斜照寒潮忽倒流
牛羊平野散鵝鴨小溪浮喜見平生友籬邊一繫舟

除日守歲

守歲西清第幽懷強自寬極慚公子意須盡老夫懽
明日王春始疎星客夜闌殷勤一杯酒到手莫辭乾

晚眺

明詩綜卷六

十五

極目三邊靜傷心萬室空斷山明落日飛藿卷回風
漢節無歸使夷歌有野童煙塵幾時息歸釣古城東

送胡鼎文同知赴安州

別駕安州去青天蜀道危近辭丹鳳闕遠過碧雞祠
暮雨歸神女春風怨子規宦游多好思重和杜陵詩

壬子冬至日過來青堂示勉中祖南二友

衣冠且從俗猶有晉風流我愛陶貞白人稱馬少游
蜂房寒未割雞柵暖宜修不必論三仕何如號四休

送王克讓員外赴陝西

貂裘萬里獨衝寒舊是含香漢署官白雪作花人面落
青山如鳳馬頭看關中相國資王猛海內蒼生望謝安

應念東南有遺伏采芝深谷尚盤桓

十月聞雷

天氣初寒春尚賒坎中夜半有鳴蛙百年宇宙喧戎馬
十月雷霆起蟄蛇老柳黃垂霜後樹小桃紅破雨中花
三公變理非無術愁聽空江度鬼車

清明日陪楊鐵厓飲城東門是日風雨

盪舟撾鼓出東門怪雨盲風野色昏海上一春猶作客
樓頭三日共開尊青山石馬新人家錦樹黃鸝舊相園
快意百年須痛飲轉頭何處不銷魂

即事

少海旌旗落照中沙陀兵馬鴈門雄朝宗久廢諸侯禮

明詩綜卷六

翊戴方尊節度功今日豈宜求騎劫當年應失倚全忠
丹書鐵券存終始萬古山河帶礪同

經故內

山中玉殿盡蒼苔天子蒙塵豈復回地脈不從滄海斷
潮聲猶上浙東來百年禁樹知誰惜三月宮花尚自開
此日登臨解題賦白頭庾信不勝哀

雨中書懷

漢苑秦宮跡已陳金沙一簇為誰新山河有恨空懷古
風雨無情只送春南國鷓鴣愁北客東家胡蝶過西鄰
尊前莫唱昇平曲白髮秋孃也自顛

秋思

兩河兵合盡紅巾豈有桃源可避秦馬上短衣多楚客
城中高髻半淮人荷翻太液非前日花落蕃禧又暮春
莫上高樓望西北遠山猶學捧心嬋

庚戌九日是日聞蟬

今日出門風雨收東山西山須可遊那能束帶從王事
且復開尊破客愁鴈別紫臺初避雪蟬鳴紅樹不知秋
桃花細雨應相笑歲月無情自白頭

送楊九思赴廣西都尉經歷

邛笮康居路盡通西南開鎮兩江雄漢家大將推楊僕
蠻府參軍見郝隆象跡滿山雲氣白雞聲千戶日車紅
明珠薏苡無人辨行李歸來莫厭窮

明詩綜卷六

七

過泐季潭長老三塔院飲於志遠宅賦詩

城南看花花正開清明微雨灑塵埃路從周處臺前過
山轉曹彬廟下來墮地遊絲輕復起近人嬌燕去仍回
高歌擊節狂懽賞共盡生春酒一杯

及山隱居夏日

病客從教嬾出邨兩山一月雨昏昏野花作雪都辭樹
溪水如雲忽到門無復元戎喧鼓吹試從田父牧雞豚
來青處士時相過猶是平原舊子孫

懷內弟陸熙之

我別語兒溪上宅月當二十四迴新如何故國尚戎馬
即恐比鄰非昔人簫鼓誰家猶作社樓臺廢苑不成春

夜闌憶爾無由見，悵望黃姑析木津。
秋興和方文敏

一日龍飛濠泗間，橐駝牛馬走冥顏。
更却呼韓閉玉關，使者旌旗分道出，將軍部曲凱歌還。
白頭野老知何事，紫氣長瞻萬歲山。

送馬伯溫之廣西

樓船槌鼓發江中，昨夜檣烏喜北風。
何知別後已成翁，浮天雪浪三湘闊，到海雲山百粵通。
有子漢陽專簿領，一緘千里託飛鴻。

遣興

我住雲間今四秋，恰如杜甫在秦州。
賦詩黃耳家前去

明詩綜卷六

六

打鼓白龍潭，上游暮景飛騰如過翼。
此身浩蕩一虛舟，黃塵紫陌繞車蓋，且伴老翁隨海鷗。

讀胡笳曲

日年已到甲辰終，休倚山河百二雄。
一龍今見起江東，專門學士空談道，仗鉞將軍競策功。
忍聽蘆笳舊時曲，此身飄泊歎秋蓬。

黃灣述懷二十二韻寄錢思復

海岱初雲擾荆蠻，遂土崩王公廿久辱。
奴僕盡同升遠，適將妻子端居謝，友朋草堂森苦竹。
瓜圃蔓寒藤地盡，山光斷天昏海氣蒸。
夜深常畏虎，秋後更多蠅。鶴髮愁難理，烏皮嬾自凭。
娉娉羞不薦，齷齪怯先登。拔劍歌誰

和聞笳寢復興過逢欣已絕疾病恨相仍自擬秦民去
重煩魯使徵吹毛多見摘刺舌尚須懲耆老惟君在文
章對客矜才全懷白璧道重比朱繩虎榜名非忝雞林
價盡增極知童子陋深媿大巫稱最憶春停騎高談夜
翦燈病駒終棄擲生鶻必飛騰跡已從信屈時多任愛
憎賦詩閒莫廢好事老猶能漢月今頻滿天河本自澄
山陰有孤權雪下興還乘

壬子夏端居二湖與二三子讀書而苦熱如焚一
坐四遷杜少陵發狂大叫非過言也回思雲間時
往來呂邵二族其地有林藪之美池臺之勝可以
避暑而游士寓公咸會於此相與窮日夜為樂及

明詩綜卷六

十九

兵變之後所至成墟海內忘形半為異物感衰榮
之無定悼生死之相違遂成三十四韻

地僻從吾放山深少客過昏昏蒸酷暑鬱鬱抱沈疴斷
酒愁蒸敵拋書睡作魔雲生空望雨水涸不通河唱和
聞蛙吹遶遊記鶴坡輞川移絕境瀑布激懸波數子論

新好諸翁樂太和百篇齊屈賈楊鐵馬文五字逼陰何鄭本

共哂佯狂徹魯道厚焉知好辯軻壁文冰壺清莫比夏景淵

鐵硯老猶磨厚德公子時同載夏士文將軍夜不訶邵質

結交真有道倪菊存與物總無他倪耕開每喜方舟坐何煩

信馬馱秋風千戶竹宿露半池荷席賭藏鈞令亭邀竊

藥娥有賓月亭頗黎行凍蟻瑪瑙進寒鼉潦倒衣從溼鼓傾

明詩綜卷七

小長蘆 朱彝尊 錄

半邏 錢 炘 緝評

徐一夔 二首

一夔字大章天台人徙嘉興元末建寧教授洪

武初名修禮書終杭州府學教授有始豐類稿

靜志居詩話實錄洪武二年八月詔儒臣纂修禮書徵儒士徐一夔梁寅劉子周子諒胡行簡劉宗弼董彞蔡深滕公瑛至京時曾魯以元史方成奏留之同纂修三年九月書成賜名大明集禮通五十卷授曾魯徐一夔周子諒董彞以官梁寅等六人以疾歸還鄉里宋景濂撰楊廉夫墓志云國朝天下大定詔遺逸之士纂禮樂書君被命至京師僅百日而肺疾作乃還卒年七十五洪武庚戌夏五月也而梁孟敬贈徐大章序則云吳元年丁未歲以詔徵至都大章亦見徵是時置三局一律局二禮局三誥局余備員禮局而大章撰誥文同居官寺者半歲云云若是則禮局律局同時分設而大章孟敬俱於吳元年即被徵矣實錄又載吳元年八月徵江西儒士劉于等至京欲官之俱以老病辭各賜

明詩綜卷七

一

皇道遠則劉于亦以吳元年即被徵矣劉宗弼者承直之字承直於吳元年十月官國子司業不應於洪武二年又同遺逸之士並徵也又中書省定律令亦係吳元年十月事至十二月律令成命頒行之則律局可概不煩二年猶與禮局並存也此皆事之大可疑者相傳廉夫賦老客婦詞進御其辭云老客婦行年七十又一九按是歲己酉廉夫年七十有四爾何必增益其齒以誣孝陵邪殆好事者為之又攻當日同修禮書尚有魯淵道原實錄則而不書者以道原書未成時先卒也梁孟敬有輓詩載石門集大章遺藁李傳余於京師見之今刑部尚書新穉王先生貽上所凡四冊比余家藏者倍之然驗其目無詩猶未是足本也

至正己亥兵後明年八月之望同守繆公招同諸

彥集南湖即席分韻得久字

青丘緩頰瘞黑颺撼九有海走翻蛟宮山移若螳阜雖

愛赤城霞歎瀑當窗牖棄擲不敢顧欲卧豈得久里處

擇其仁於焉得林藪衍原饒稂莠詩書足朋友何期復

中兵難作在丁酉東西競奔竄顧尾不救首幸云全此

軀長疑是夢，否還見湖上月。兼之對名酒，狂奴故態萌。

嘯然開笑口。郁伯承云：僧雪廬資聖寺記，至正十八年八月嘉興兵變而大章詩云：難作在丁酉，是丁戌已三年郡皆被兵也。故高士勅詩亦云：前年奔山，

亦云前年奔山，

辛丑秋七月，曹廣文招同諸子，憩西郭景德寺分韻得半字。

韻得半字

野曠天逾豁，川平路疑斷。不知何朝寺，突兀古河岸。潭
蘿白氣沒，林密翠霏亂。勝地固清涼，火流七月半。合并
洵難得，通塞奚足算。廣文厭官舍，亦此事蕭散。風樞爵
屢行，蘿磴席頻換。但覺清歡發，寧顧白日盱。吾欲紀茲
游，埽塵勞弱翰。

梁 寅 二十四首

明詩綜卷七

二

寅字孟敬，新喻人。元末辟集慶路儒學訓導。洪

武初徵修禮書，書成以老疾辭歸，有石門集。

詩話孟敬入禮局，雖不為好爵，所鑿然石門集中賦南歸則云：煌煌乎大明之盛典兮，搜巖穴而芻徵。承賜金之渥恩兮，荷錫服之殊榮。寄子
頌詩云：赫赫皇明，文治肇興。惟俊良是詢，惟隱淪是徵。嗟余罷老，亦承
詔以行東武吟云：隋珠耀明月，和璧誇懸黎。及時不自獻，明君焉得知。
寫館咏懷云：聖君優老無窮感，京城元夕云：萬里昇平感聖朝。洪武元
年正月四日恭親龍飛歡忭而作詩云：赫赫大明逢盛代，載歌周雅贊
皇文。感恩頌德之辭不一而足。方之抱遺翁似有間矣。故序於通籍者之列。

歸醴溪

久厭都市喧，俛思山巖靜。歸飲醴溪泉，怡我淳樸性。神

峰雜樹擁，石門翠厓並。蘿懸晨露滋，嶽秀夕霞映。褰裾

蔭雲松，脫屣悅風磴。悠然遯客心，疊出野人詠。方期谷

口耕，毋諂終南逕。

和楊逸人桃林遷居之作

心寂忘塵蹻時清樂巖築愛此桃華林葺之杜衡屋葛
籬延芳藟石梁照淺淥風翔雙白鳥雨卧一黃犢東皋
雜婦子中野見樵牧賦詩雲霞臨攜壺錦繡谷從君以
優游於焉謝羈束

題西山程氏南窗

獨居南窗靜秋木連翠岑鳴琴衆葉下把酒孤猿吟寧
負朱紱願莫乖白雲心羨彼歸田叟高風留至今

為臨川章則常題山水圖

山擁衡廬青水含瀟湘碧兩厓蟠蛟樹千歲蹲虎石遙
遙溯川舟泛泛騎驢客憑高者何人閒看楚雲白

明詩綜卷七

三

題印土寺罷釣軒

曲池照林隴百尺懸蘿陰開軒坐垂釣水清如我心小
魚易傷生大魚或淵沈投竿為之惻於此悔悟深名區
縻好爵都市爭黃金但戀釣餌馨豈知憂患侵濯足南
澗流振衣北山岑既羞結網罟何必漑釜鬻物生免相
賊吐似常自禁嘉此古人意託之金石音

擬古 六首

獨處衡門下慨然思九州我馬苦疲怯山川多阻修豐
草被長坂麋鹿或羣遊蔚彼嘉樹陰鳴禽自相求彼物
各有適而我何寡儔日月雙車輪恒恐不少留願與二
三友朝夕論王猷毋為白局促窮廬悲白頭

芙蓉在江浦，亭亭豔清波。雖云出淤泥，麗質良可嘉。寒裳涉枉渚，凌風折芳花。願言贈君子，翫之比瑤華。於時苟不惜，顛顛當奈何。

江海處卑下，百川皆赴之。山木鬱蕭森，上竦無繇枝。王侯稱孤寡，惟恐嬰舊危。謙虛受衆益，天道盈必虧。周公下白屋，吐哺情孜孜。孫子相南楚，祿豐心愈卑。奈何閭閻子，往往多矜持。

昔嘗好名山，五嶽期遍歷。思見松與喬，再拜問仙液。微生累妻孥，常為飢凍役。歎此血肉軀，何以生羽翼。諒非金石同，服食竟何益。不如安我常，百年順所適。雲門輟清響，鄭衛音方揚。錦衣受垢污，不如練布良。軒

明詩綜卷七

四

軒青雲士，鳴玉升廟堂。名高受讒毀，寵盛罹愆殃。美女惡，女仇偏聽姦。以萌衆口，能鑠金况。乃忘周防，所以君子心。惟用德，自將行行。九折坂戒哉，銜屢傷。

我有太古琴，千年妙音續。七絃何泠泠，聽之非促速。一彈文王操，再彈宣父曲。聖人宛見之，何由躡其躅。大道日以淪，澆詭馳衆欲。孰思障頽波，九州反淳俗。夔龍為股肱，巢許遜巖谷。窮通各有志，於我奚不足。

歸息二首

歸息蒙嶺陽，聊比嵩少岑。樂此林藪趣，遂忘江海心。浴澗蹇芳藟，入谷聽幽禽。流泉響松下，潺湲非俗音。猗蘭被徑畹，香氣襲衣襟。頽景忽西匿，浮雲夕以陰。睠彼羣

飛鳥翩翩投北林

春陽旣和煦時雨亦霑濡原野綠已遍土潤含膏腴兵
戈幸少戢良農日墾鉏戴勝鳴桑林鷓鴣亦文呼嗟我
理編簡四體忘勤劬羔裘媿道遙梁鶴恥安居素餐古
所誚偶耕良我徒

簡伯英伯筠見訪雨留信宿

谿谷雲晝合東林微雨來二友歛俱至一見紓中懷
我茅茨室為君緇帙開上言風雅醇下言豔歌諧何以
相淹留清醕不盈杯何以為遠贈媿無瓊與瑰煦風失
堅冰谿水流潛潛歸鴻正翱翔浮鷺散差告我遽言
旋定省恒懼乖懿此孝友心令德善自培願為王國士

明詩錄卷七

五

無媿北山萊

題番禺蔡淵仲默齋

獨坐衆蹠寂靈淵虛以澄樸拙固吾性佻巧非吾能言
辭戒放逸脣頰思緘滕吉與躁殊趣仁以訥見稱訥叻
譽何損叟叟時所憎恐玷懷白圭來讒忌青蠅無妄天
之佑主靜道斯凝曾閔庶可慕子賜在所懲萬言不如
默誠哉宜服膺

林下

客尋林下居逕幽不待埽疎篁延柔蔓殘果落深草禽
言人莫知虎跡僮驚報何事嬰余懷甕牖悟天道

簣谷作

老樹山橋畫瀟灑興來濯足蒼藤下雲邊厓石危欲落
雨後泉流急如瀉客過松林貪翠陰農分稻苗散青把
桃源風土良可樂何恨龍鍾在田野

對雨

飛雨山棚爽繇雲竹巷迷翠藤低拂石黃葉澹露泥樹
杪盤飢鶻牆根泣露雞園夫桔槔廢流水滿青畦

贈西山僧

高僧自喜巖下住長見白雲飛復迴半山風吹松子落
千歲石作蓮花開鳥下林堂待分食龍遊溪水遇浮杯
吳山楚山聊暫住還把楞伽歸去來

天寧寺和曾得之兼呈彭聲之及雪印

明詩綜卷七

六

經年不到天寧寺却喜春濃叩竹扃二水共明洲外碧
千峰如削雨餘青謾勞山茗時時煮自笑齋鐘日日聽
垂白飽聞高世論巖棲空媿老窮經

初夏

樹暗雲更深鳥啼春已去多謝桃源人能留漁父住

為王仲義題雪梅

小橋東郭先生履曲逕西湖處士家向暖早看花似雪
冒寒更愛雪如花

和何彥正春耕二首

見說春耕溪水頭賦詩猶憶玉京遊莫誇塞北千蹄馬
寧買江南十角牛

竹間樵逕行應熟花外漁舟望欲迷處處稻畦分落照
荷整人去水禽啼

劉承直一首

承直字宗弼以字行贛州人元進士明初與修
禮書官國子博士升司業出為浙江按察司僉

事王子充云劉君工課
禮出入鮑謝之間

秋日東林宴坐

高秋坐虛館颯然神慮清迴颺颺疎雨瀟灑集前楹始
欣塵瑤遠稍覺微涼生簷鐸遞相答林蟬時一鳴物情
各有適吾生豈無營

周子諒

二首

明詩綜卷七

七

子諒名愷以字行廬陵人與修禮書授工部虞

衡司主事

劉仲修云子諒之文豐而不汎乎辭約
而能達其意其詩清新婉麗春容幽遠

讀子書作

學館坐無事故書聊復翫披文既蒼葢尋義亦泮渙趨
前後已逸顧舊新輒窺萬言雖畢陳一理竟未貫往往
卷未終心目已潰亂易書詩春秋辭簡義亦煥奈何百
家書纍纍壘几案縣延比葛藟根遠益纏絆雕剝出葩
卉綴緝呈組纂推以合身心宜若霄壤判吾欲盡其文
掇取歸爐炭往者予弗及來者予何憚作詩示朋曹無
乃駭童壯

贈別郭元達

黃鶴乘天風飄飄忽高翔飛飛巢林鳥刷羽情內傷豈
無凌霄志六翮不得長念子平生意相送以徇徨勿言
易為別明發各一方悲來解佩劍為子復進觴且為游
子歌歌詞何慨慷疾風吹征颿旭日在衣裳自古有離
別各言慎行藏

林

弼 三首

弼字元凱初名唐臣龍谿人仕元為漳州路知
事戊申內附以儒士登春官修禮樂書除禮部
主事歷登州知府有梅雪齋臺

龍州

三首

峒丁峒婦皆高髻白紵裁衫青布裙客至柴門共深揖

明詩綜卷七

八

一時男女竟誰分

近水刺桐知驛舍倚山毛竹即人家趁墟野婦沽甜酒
候客溪童進辣茶

白沙青石小溪清魚入疎罾艇子輕漫說南荒風景異
此時真似剡中行

張

翼 二首

翼或作翼字翔南建德人徙居嘉興元至正乙巳舉

于鄉薦主甬東書院山長不就吳元年徵入禮

局告歸有梓字集沈客子云翔南歸自禮局郡庠延訓諸
生家近宣公祠庭有巨梓集以是名

詩話洪武修禮書吾鄉與者三人徐一夔大章陳世昌彥博及翼也翼
所居有巨梓一夔為作記楊廉夫亦有題咏故翼作楊哀辭有云志梓
寓榮家棗子又斯昌乎聲詩梓字集
不傳朱翰輯稿李安華取其詩壓卷

賦得非溪春水送張別駕

春風吹花澄海門
非溪雨足浮春雲
碧漪分流入城去
石闌倒壓玻璃紋
使君青驄駐溪側
槳鼓官船送行色
片帆直泝五湖風
水晶宮中夜吹笛

西湖竹枝詞

南高北高峰頂齊
錢唐江水隔湖西
不得潮頭到湖口

郎船今夜泊西溪

詩話辛丑夏留湖上昭慶僧舍時
曹潔躬周元亮施尚白諸先生
先後來游杭人有持元西湖竹枝請錢先生甲乙者先生謂曰和者
雖多要不若老鐵次日羣公泛舟於湖曹先生引杯曰鐵屋原倡之外
誰為擅場各舉一詩不當者罰周先生舉陸仁良責作云山下有湖湖
有灣山上有山郎未還記得解儂金絲索繫郎腰下玉連環施先生舉
張簡仲簡作云鴛鴦蝴蝶盡雙飛楊柳青青郎未歸第六橋邊寒食兩
催郎白苧作春衣南昌王猷定于一粟嚴恭景安作云湖中女兒不解
愁三五蕩雙百花洲貪看花間雙蛺蝶不知飛上玉搔頭吳素子令

明詩綜卷七

九

昭舉強理彥粟作云湖上女兒學琵琶滿頭都插開妝花自從彈得陽
關曲只在湖船不在家武進鄉抵謫許士舉申屠衡仲權作云白苧衫
兒雙髻一望湖樓子是儂家紅船撐入柳陰去買得雙頭茉莉花錢唐
胡介彥遠舉徐夢吉德符作云雷峰巷口晚涼天相喚相呼出采蓮莫
為采蓮忘却藕月明風定好迴船蕭山張杉南士舉繆佩叔正作云初
三月子似彎弓照見花開月月初月裏蟾蜍花上蝶潏渠不到蘆橋東
山陰祁班孫奕喜舉釋文信道元作云湖西日脚欲沒山湖東日出牙
梳彎南北兩峰船上看恰似阿儂雙鬢鬢錢唐諸九鼎駿男舉馬琬文
璧作云湖頭女兒二十多春山雨點明秋波自從湖上送郎去至今不
唱江南歌子曰諸公所舉皆當然未若吳興沈性自誠之作也其詞云
儂住西湖日日愁郎船只在東江頭憑誰移得湖山去湖水江波一處
流不獨寄託悠遠且合竹枝縹緲之音曹先生曰然沈作略同又吳世
亦浮一大白回思舊事四十年矣錫翔南詩其旨與沈作略同又吳世
顯彥章詞云湖中日日坐船窗水面鯉魚長一雙好寄尺書問郎信惱
人湖水不通江意亦相合
然俱未及沈之俊逸也

劉儼一首

儼字敬思錢唐人元末隱居西湖明初徵入修
禮樂書授廣東市舶司令有樗隱集

詩話敬思為管長史訥之師其卒也管哭以詩云痛哭劉夫子如今關
九泉家聲俱溢耳才望孰齊肩百氏遭漁獵專經費討研萬章何懇懇
宋帛竟戈戈東壁星辰表西清雨露邊班陪黃閣老名綱玉堂仙禮樂
皆新製方輿有續編宣麻應內命行李忽南遷漢節歸蠻雨黎歌入瘴
煙客庖魚米賤商舶編象解聯省檄官將調郵書計遠漢哲人其逝矣小
子獨淒然踵接才雖劣心喪禮自專不知雙眼淚何日罷潺湲了鶴年
極稱之

舟中漫興

青天縹緲吹雲衣碧水顛倒插翠微
三家五家村舍出一點兩點沙鷗飛
柳絲裊裊拂過艇苔花斑斑生釣磯
風塵不到是樂土莫怪往來城府稀

魯

淵

四道

淵字道原淳安人至正辛卯進士江浙儒學提
舉洪武初徵修禮樂書詔授江西按察司僉事

明詩綜卷七

十

以病辭有魯道原詩集

道原前進士明初應召入禮局辭還山王逢贈詩云相期

文苑傳獨立義熙年亦有元遺民也

魯

詩話道原為沈原昭之師嘗與楊廉夫張光弼校文貢院其題入貢圖
詩云九州文軌通書浪萬里梯航玉帛齊感懷詩云越裳翡翠供輸少
遼海雲航漕運通蓋猶及見元歲時者其後幾死於寇極其顛沛晚
宿新冬詩云杜鵑山外家千里如惡聲中淚兩行誦之亦可悲矣

風

題馬文壁秋山圖為盧仲章賦

野館空山裏林泉象外幽
淡雲初霽雨紅葉早驚秋
路轉山藏屋橋危岸倚舟
直疑人境異便欲問丹丘

越中避難適周橋

喪亂今如此漂零豈偶然
有身長作客無地可歸田
兵火淒涼夜風塵黯澹天
故人知愛客同權鑑湖船

長安市

夜泊長安市鄉鄰崇德州驛亭無駐馬堰水有行舟壞
道蕪荆棘陰房聚羈馱淒涼兵火地人物總荒丘

重九

白鴈南飛天欲霜蕭蕭風雨又重陽已知建德非吾土
還憶并州是故鄉蓬鬢轉添今日白菊花猶似去年黃
登高莫上龍山路極目中原草木荒

劉永之 二十一首

永之字仲脩清江人明初徵士有山陰集

梁孟敬云仲脩

遺詞發詠追金球璧鉅篇短章繁度悉合 教子發云山陰翁詩諸體皆工而七言絕句尤佳不徒深入簡齋門戶亦可與晚唐諸賢自戰於變風境上而莫之雌雄者 簡一溪云先生詩詞格調精工諸體備至渾灑乎風雅之遺 仲脩詩文清麗古雅

詩話仲脩應聘入都以耳疾辭其林陵述懷詩云設蒙曲臺名乘筆從諸公則亦微入禮局之一人矣宋景濂以辭章翰墨雙絕稱之贈詩云

明詩綜卷七

十一

多少薦紳求識面江南文價爲君低觀集中與梁孟敬論春秋書謂胡氏之春秋非經之本旨自爲一書可爾使聖人者若後世之法吏深文而巧詆蔑乎寬厚之意此其失非細故也其識出環谷東山諸君之上其詩務去陳言取材新穎五言如青年杜書詔白髮漢郎官澗水穿林去山雲帶雨回兩微簷溜緩風急鷺聲稀野燒兼風起邊烽共月升春明三毒草雪映九英梅蟹舍能留客漁舟不畏風塵蘆花下轉蕩官兩中鉅白鶴窺殘奕青童掃落花路危樞葉斷石陰柱根懸座柵成山壘漁梁阻澗泉石夾如過橋柳暗烏爭樹當戶花開燕入簷近瀑飛雲經樹濕穿花流水過橋香朱鉉鑊管書若紙銀篋秋金蔓橘湖古硯自磨銅雀瓦坐檀還疊扇扇扇石泉落落處兼雨楓葉飄來冷帶霜杜若烟生螺子港桃花水暖象牙津千峰靜對芙蓉幕三峽遙連蠅蝶橋竹輿暝煙浮翠黛石田秋雨澗銀沙沙田蒸蔗家家熟野徑丹楓處處飛井底龍飛山客見峰頭度過野人知白雲當戶心同 靜亂竹侵階手自刪何其似姚少監鄴都官也

秋懷

涼颼振庭樹浮雲結重陰中情忽不樂拂几彈鳴琴冷
冷多苦調零淚霑衣衿遠懷東都士登彼北邱岑悵然
望京洛五噫發哀吟悠悠千載下誰識古人心

登煙雲臺同西峰諸友分韻得跨字

振策履崔嵬飛步凌雲榭
俛觀飛鳥翔遠見平江瀉
彈碁古桂陰酌酒長松下
谷響嘯哀猿林香過山麝
祈靈醉巫覓尋真望仙
駕翠蚪金節導青鸞羽衣跨

訪驛馬精舍能上人不遇識其從孫蕭生進脩夜坐誦詩次日書此識別留東能公

晨起忽不樂驅騎高原行
四山多嵐氣日照孤峰明
亭午際江渡煙艇浮沙汀
登岸迷所適岐路方縱橫
忽憶驛馬寺久慕能公名
詢塗向煙霧阡陌互紆縈
漸入石路窄松蘿藹冥冥
龍象雖寂莫廊廡猶崢嶸
道人赴齋出鍾梵杳無聲
款戶識之子開室出相迎
宴坐畢餘景

明詩綜卷七

十一

空花聞夕馨山尊瀉芳醕
秋蔬摘霜莖性味空寂旨
心樂儒雅清夜止西窗宿
風條中夕鳴病客既多感
聞此心骨驚明當舍之去
沿流到江城方從湖海游
暫遠林壑情山門蔭寒沼
中涵苔蘚青法源庶無竭
歸日濯塵纓

過安慶精舍

淮壖古重鎮龍舒實雄冠
顯顯青陽公銜命茲屏翰
文能宣皇風武能折兇悍
仁能撫士卒知能輯流散
孤城抗千里一身當敵萬
運否絀壯圖肯屯負英算
城凶遂捐軀仗節死國難
忠義凜霜日聲名炳星漢
我來當夏杪延覽遂興歎
俯仰成古今興亡猶在眼
疲人稍歸郭

買舍臨江岸午風舟舫集夜霽燈火亂精靈或來往廟
食儼容觀生爲烈士尊死爲姦臣憚嗤嗤吟詩臺千載
污青簡

同傅商翁何彥正舟中有懷辛好禮韻

沙際水痕交細草蒙茸長春江下連鴈夜雨同孤舫佳
期違宿諾歡笑懷前賞餘燼落寒燈卧聞漁板響

劉宗海爲余作清江春雨碧嶂秋嵐二圖賦此贈
之

劉君早年善山水得意往往圖樵漁西昌城西一相見
忽然贈我雙画图圖中似是清江曲春雨蒼茫汀樹綠
煙中髣髴辨飛帆水際依微見茅屋漁郎繫船江石上

明詩綜卷七

十一

一夜磯頭水新長孤村日暮煙火微渡口歸人暝猶往
碧嶂層巒翠轉奇嵐光秀色含朝暉風林落葉灑青壁
雲壑流泉生翠微我昔結廬此山裏每愛秋嵐淨如洗
經年奔走厭風塵偶看新圖心獨喜憑君添我小綸巾
明當歸埽山中雲他日君來一相訪松根爲子開柴門

題金華余仲揚山水

人言吳中山水好坐思絕境那能到金華山人懷故山
時拂水紈寫幽島贈君此圖更絕奇妙墨精思奪天造
陂陀重阜隱喬木掩仰遙汀帶文藻石嶠雲生暮色微
海門潮落秋風早賀監居臨鑑湖曲子猷宅近山陰道
江清落日櫂船回照水新袍影顛倒高情千古慕前哲

世俗紛華豈堪保經年烽火遍江南萬壑千峰迹如埽
畸人奔走厭塵濁試觀圖画開懷抱思傷幽林結茅屋
柴門低映寒藤老放鶴前山戴笠歸獨抱長鏡拾瑤草
題古木幽篁圖

近者天下寫竹枝息齋子昂最奇特金釵折股錐画沙
直以高情寄豪墨後來小李用家法更覺縱橫脫羈勒
御榻屏風或詔寫流落人間豈多得我家真蹟兼數公
錦囊玉軸複壁中舊宅荒涼經戰伐故物都隨煙燼空
此圖尋丈小李作位置頗殊標格同半身古樹色蒼潤
篔簹因依相澹濃長林無人秋氣入蜿蜒蛇蛟起幽蟄
蠨蛸垂絲晝陰靜老鶴刷翎昏雨集黃陵廟前湘水深
捐玦江皋思俯拾浮槎尋源溯空闊析旌低度玄雲濕
何郎兄弟最好奇愛此不減珊瑚枝幽居正在蘭峰下
亦有喬木當窗扉共展長圖幽興發六月涼颼生葛衣
還君珍襲增歎息他日重看覓舊題

陳君心吾以黃鼠筆見貽此筆唯京師多用之江
南罕得也賦此贈之

水鼠金毫銳霜筠翠管長攜來南郡遠制出北州良內
史來禽帖黃門急就章秋林多柿葉揮灑興難忘

送吳德基赴興化令

春江望不極芳草綠江潯千里長沙道孤帆去客心懸
城依水國吏語帶蠻音到日應無事華亭自鼓琴

經湖口縣

古縣開湖口高檣集岸隈山從廬阜起江向武昌來近
水皆楊柳荒城半草萊客心元自速更遣曉風催

爲高安何思恭題方壺所画山水

古象山中白晝閒紫煙樓觀鳳笙寒試分玉井三秋露
戲寫方壺九疊山老樹模糊常帶雨茅茨瀟灑鎮臨湍
知君隱處渾如此持向荷峰錦水看

題画鷹

猶記鳴鞘出霸陵新豐市北醉呼鷹於今豪氣都消盡
閒看新圖剔鴈燈

題扇

明詩綜卷七

十五

烏絲細寫蠶頭篆白紵新裁燕尾衫雨過西軒苔色淨
澗中雲影似江帆

題竹

洞裏仙人白兔公手持玉笛向秋風彩雲低度天如水
吹作龍吟三月中

題扇

金鳳洲頭倒玉壺銅塘浦口送飛艫他時若記分攜處
花滿春城聞鷓鴣

寄西峰道士二首

百尺飛樓接太清萬年枝上月華明鹿車入谷無人見
應是仙人衛叔卿

石室虛明隔紫煙靈文中闕白瑤鑄丹書隱字誰能識
歲月應題建武年

北澗夏日

酒傾蘭勺石泉香衣翦荷盤露氣涼誰料十年江海興
閉門疎雨對橫塘

夜宴定侯宅醉中口號

刻羽堂中画燭明將軍夜醉水西營青樓小婦新承寵
彈得涼州第一聲

為彭子弘漁釣圖

彭郎磯畔小茅堂露滿秋林木葉黃石渚水生魚欲上
一江風雨夜鳴榔

明詩綜卷七

十六

孫作

四首

作字大雅以字行一字次知江陰人洪武癸丑

名修日曆書成除翰林編修以老病乞外授太

平府儒學教授入為國子助教遷司業有滄螺

集

李武曾云胥元季之人咸襲抱遺老人詩
派東家子獨以蘇黃為師洵特立之士也

詩話編纂日曆洪武六年九月事也先是徐大章報王子充書曰近世
論史者莫切於日曆日曆者史之根柢也其法以事繫日以日繫月以
月繫時以時繫年猶有春秋之遺記事之法無倫此也宋重史事日曆
之修必諸司關白如詔誥政令則三省必錄兵機邊事則樞庭必報百
官之拜罷刑賞之與奪臺諫之論列給舍之繳駁經筵之論答臣僚之
轉對侍從之直前故事中外之彙封匯奏下至錢穀甲兵獄訟造作凡
有關政體者必隨日以錄歲終臨修宰相點檢修撰官日所錄事有失
職者罰之其慎重若此日曆不失則後日會要之修取於此他年實錄
之修取於此百年之後紀志列傳取於此此宋氏之史所以可據也元
則制度文為務從簡便不置日曆不置起居注獨中書置時政科以一
文學掾掌之以事赴史館又一帝崩則國史院據所付以修實錄若順
帝三十六年事既無實錄又無參稽之書惟憑採訪以足成之竊恐其

事未必覈其言未必馴其首尾未必買也其論實自大章發之修日曆者七人孫大雅與焉大雅自號東家子以文見知於牛士良宋景濂爲作東家子傳謂他人之文束於理則辭不暢肆於辭則理不直惟公洞囑千古之上折之則理勝關之則辭嚴動有據依皆非臆說其推許至矣詩絕去元季之習好盤硬語有云鯨子落筆崩海江豫州吐句敵山岳湯湯濤瀾絕厓岸寧寧末石森劍鏃二子低昂久不下數澤遂包龜與鱗至今雜選呼從賓誰敢哢強二子角吾尤愛濂章撫義氣先髣髴牙咋舌熊豹面以手捫膺就束縛士如此老固可佳不信後來無作蓋欲力追浩翁宜詩之不肖猶人也

大堤曲

君騎白馬來我騎青驄去背面不相識兩馬驕嘶住

客中秋夜

故園應露白涼夜又秋分月皎空山靜天清一鴈聞感時愁獨在排悶酒初醺豆子南山熟何年得自耘

石菖蒲

明詩錄卷七

七

曉露飛初濕春苗剪又生靜憐千葉瘦幽喜一峰橫鬱鬱明人眼青青異物情安期如可待吾亦掃黃精

送杜孝廉往句容

江東勝地壓西浙句曲山傳天下稀林間風生一虎過石上月明雙鶴歸我擬華陽裁白蛤君如萊子奉斑衣日長縣幕娛親地小轡疎櫺入翠微

錢

宰二十四首

宰字子子一字伯均會稽人元進士明初以明

經徵修禮樂書授國子助教乞歸名較書翰林

加博士致仕有臨安集

徐子元云博士詩如霜曉鯨音自然洪亮黃才伯云博士病近代

新聲太繁刻意古調擬漢魏而下諸作補其小馴者詞林稱之

詩話博士吳越武肅王十四世孫孝陵命撰帝王廟樂章稱曰每進見輒賜坐侍食嘗賦早朝絕句云四鼓夔夔起著衣午門朝見尚嫌遲何時得遂田園樂睡到人間飯熟時明文華譙單帝諭曰昨日好詩朕曷嘗嫌汝何不故作憂字又曰朕今放汝去好放心熟睡矣乃遣還二十七年詔徵同揭軌等二十六人定正尚書蔡元傳命開局翰林院賜綺繒衣被入朝班侍衛之首賜飲酒樽還里年九十六乃卒二十四人者黃觀景清在其中實錄特刪去蓋永樂中以名在姦黨故也博士詩波瀾老成諸體悉稱韓宜可唐愚士皆師之

擬古七首

出門萬里別行行遠防邊相望各天末北斗日夜躔四
運秋復春不見君子還燕車北其轍越馬南其轅目遠
心愈近悵然徒懸懸黃雲暗關塞路險不見天式微夫
如何日月忽已遷願言崇明德無為終棄捐

高臺何巍巍參差與雲平玉繩臨雙闕長河流無聲上
有羽衣人逍遙吹玉笙清響涵明月飛珮何泠泠借問
弄者誰疑是董雙成曲終再三歎感慨有餘情所悲同

明詩綜卷七

六

門友局促趨世榮願將秋水劍為之解塵纓笑呼雙黃
鶴與子俱遠征

涉海采琅玕紅者珊瑚枝明珠盈懷袖將以遺所思海
闊不得返所寶莫致之爛其納我室抱璞將何為

青青梧桐樹託根在高岡與子新合歡翕如鳳與皇鳳
皇鳴鏘鏘合歡期世昌歡情一何短離思一何長嗟彼
籬下菊含英揚其芳晨霜秉貞節寧隨秋草黃終當采

而佩歲晏夫何傷

河東有織女皎皎雲為章手弄機上絲日夕更七襄織
成五色文欲製君子裳莫言隔秋水可以駕飛梁睨彼

牽牛星終日不服箱

故人萬里別海水日夜深南風海上來遺我雙南金不見故人面乃見故人心鑄作黃金徽置之白玉琴彈為別鶴操間以懷湘吟曲終聽者稀矯首望知音

庭樹日已黃白髮日已短候蟲鳴前除秋霜蕙花晚歲月如奔駒六轡不可挽泛舟涉方瀛方瀛水清淺安期邈難求吾擢亦已返花開醉復斟黍熟飢自飯迫然樂悟生瑤島諒不遠

分題賦載酒亭送友人之四川

大江發巴蜀岷峨蔚嶠堯子雲性佚蕩逸氣相扶搖灑翰騁雄辭凌雲何飄飄終焉歛其華組麗不足驕覃思

明詩餘卷七

十九

著玄文斟酌倣繇爰閱言極幽微繇絡天地交豈無好事者載酒與遊遨胡為事黃門投閣竟蕭條龍蛇不知藏蝦蟇亦見嘲天獨昌其文炳如日星昭子行登斯亭英爽或可招謂我欲問奇峽水阻且遙

題雪獵圖

健兒善騎射出獵古戰場白雪日夜飛蕭蕭朔風涼黃草蔽沙磧馬肥弓力強小隊出漢南十騎如龍驤前驅逐猛虎後騎接飛獐翻身激羽箭壘中兩羚羊玄熊何前却猛氣亦跳梁南行顧長戟北走脫飛鎗聯鑣愈奮捷性命不得將自謂足馳騁意氣何揚揚寧思漢廷將英勇際武皇去年出雲中置郡定朔方今年戰高闕夜

圍右賢王小勇何足矜萬里開邊疆

兵退後作

朔風號枯枝長夜何漫漫微月出復沒零露淒以溥露
溥不足悲嚴霜為之寒飢烏下叢薄猛虎鳴其間鬼燈
照虛館落葉何珊珊蕭蕭遠征人載歌行路難我心增
慘戚豈不思東還欲濟川無梁中道多阻艱弱子病且
死老妻方憂患明將登前途念我衣裳單斧冰汲澗水
采薪事朝餐慨彼下泉詩悠然起長歎

泛舟新湖塘次王敬初韻

二首

清賞各有適何異同登攀君舟泊西隩我車上東山林
光變宿雨溪響洄晴瀾春深飛花歇日入好鳥還佳景

明詩綜卷七

三

欣所得毋令清興殘俯看縱壑魚仰見培風翰物理固
有待努力當希顏胡為念窮達戚戚天壤間
湖水日已綠理櫂不可緩雜花當晝翻遠樹出雲短沙
明宿雨霽風急游絲斷悠悠歡賞深歷歷佳趣滿酒盡
客愁生歌殘離思遠世路方險巖窮居正蕭散出處諒
何心夕陽起樵管

早春寄鄉中友人

故園花發春又來碧桃半拆棠梨開流鶯踏花酒落杯
花飛落酒相縈迴酒酣起舞落日晚應念長安人未回
江上舟幾時發拍手醉唱歸去來笑摘花枝簪白髮

雲中兩烈婦

竹貞鎮雲中縱游兵掠鄉鄙張思考妻華氏伯
子婦劉罵賊死之作雲中兩烈婦
雲中兩烈婦風節何雄哉婦姑誓同死軍馬倏已來姑
言我死命所遭爾方年少不得逃欲自經不得索欲自
刎不得刀少婦潛致詞不用刀與索兒當激賊怒婦姑
頭共斫姑如湛盧劔罵賊獵獵生剛風婦如黃間弩蹶
張放弦氣愈雄厲聲奮激磨賊鋒萬古雙烈誇雲中

題趙仲庸鏡湖圖為洽上人作

趙侯胷中有泉石白髮垂顛人不識丹青不寫四十年
一見洽師雙眼碧當年王宰浪得名寸日五日勞經營
天機到時一揮灑白雲顛倒秋波明秋波在屋下白雲
在屋上香鑪秦望天東南蒼巒翠巘森相向三山落日
煙水賒秋風舊宅今荷花斷垣蒼石無路入至今人說
放翁家放翁家渺何處阿師出家不歸去不惜千金買
畫圖笑倚清江看雲樹

長江霽雪圖

昔年壯游下江漢霽雪千峰排兩岸今年看畫憶舊游
萬里江山入清翫岷峨岡脊來蜿蜒青城一峰高插天
東馳衡山走千里匡廬五老下與石城北固遙相連冰
巒雪壑互起伏照見日華破初旭神光混茫元氣浮奮
如巨鼇簸坤軸爛如秋空雲浩如滄海濤又如瑤臺銀
闕天上頭皎皎白月空秋毫回光下照中流水風吹河

漢銀雲起中流空闊不勝寒一洗丹碧秋漫漫山川歷歷真偉觀來往十年游未半不如雲瀛樓上來倚闌一日看遍江南山

題俞景山畫山水帳

老大索居江上樓廿年不出懷舊遊叩門下樓出迎客但見絕壑風颼颼岱宗日觀山上頭日出未出蒼煙浮嵩高插天太華碧蛾眉青城翠欲流匡廬老泉挂白石蒼梧水落湘江秋懸厓倚天萬山立翔鸞舞鳳蟠蒼蚪幽岑遠樹互出沒白雲不散松風收松根老樵列四五招我共入青林幽平生游歷走不遍千里萬里窮遐搜如何一日墮我前空翠雜沓來雙眸舉頭問客何因入此境迺是手持畫圖來滄州俞君作畫時雅有山林癖朝登秦望山萬壑千巖淨橫臆暮上香爐峰海色秋清上遙碧歸來放筆做董源筆底丹青浩無迹海桑一別三千年山月江風耿相憶仰觀巖上泉俯看松下石故人不見空畫圖十幅雲煙卷還客

梧桐樹

梧桐樹一葉墮秋風一葉委秋露明年二月新葉生還在今年葉飛處漢宮飛燕近承恩零落班姬不如故君不見梧桐樹

分題賦鏡湖送張用中

鏡湖白波木葉稀涼風蕭蕭入客衣季真賜宅已無主

太白酒船空櫂歸野色驚秋鴻鴈下水聲吹雨鯉魚飛
此時張翰吳中去雲鎖稽山失翠微

題趙仲穆秋山圖

人家水檻接山窗好在江南山水邦兩岸雲林皆落日
一天鳧鴈共秋江屋頭數遍青巒九松下吟成白石雙
野服何人正蕭散泊船歸醉酒盈缸

題畫菜

今日荷鋤倦嘉蔬沒四垣客來春酒綠風雨夜開園

春深即景

露梢黃鳥啄來禽蛀葉青蟲絡樹陰又是綠階春雨歇
滿庭芳草落花深

明詩錄卷七

題秦淮送別圖

綠酒斟來且莫斟酒闌歌罷去駸駸別懷恰似秦淮水
流到長江綠更深

題林處士觀梅圖

放鶴仙人不可招斷河殘月夜聞簫別來欲問春消息
花落西冷第二橋

揭軌五首

軌字孟同臨川人洪武初以明經舉除清河主

簿升知縣謝歸教授生徒召定書傳會選

沈山子云孟同

詩以唐人為圭臬斤斤不爽方之高漫士差優

河北冰泮放舟歸江南奉寄楊南宮

曉來銅雀東風起春冰凌亂漳河水郎官驚起解歸舟
一日風帆可千里侵晨鼓柁發臨清薄暮乘流下濟寧
南宮先生先我去花時想達瓜洲步尋君何處抽風帆
杏花煙雨春江南

春陰

梨花門巷泥活活楊柳窗戶綠陰陰軒車不來又幾日
風雨相思勞寸心舒州紅稻宜晚飯采石碧酒供滿斟
故人何可久不見我有新詩思共吟

過燕都故宮

八月金輿度玉關芙蓉零落後庭閒西宮無復羊車過
南苑猶疑鳳吹還承露金盤留海上廣寒瓊戶鎖人間

明詩錄卷七

三五

翠華此日知何在黃葉蕭蕭萬歲山

晚歸

苑外金波映水天歸驄蹀躞暮江邊鳳臺臺閣初含雨
燕子人家又禁煙詩寫桃花歌扇底酒攜楊柳舞樓前
請看秋雨臙脂井好醉春風玳瑁筵

宴南市樓

詔出金錢送酒壚綺樓勝會集文儒江頭魚藻新開宴
苑外鶯花又賜醕趙女酒翻歌扇濕燕姬香襲舞裙紆
繡筵草道知音少司馬能琴絕代無

姜明叔云國初於金陵聚寶門外建輕煙澹粉梅妍

柳翠十四樓以聚四方賓客觀揭孟同詩可知國初搢紳宴集皆用官妓與唐宋不異後始有禁百

詩話永樂中蜀人晏振之金陵春夕詩云花月春江十四樓十四樓者來賓重譯清江石城鶴鳴醉仙樂民集賢謳歌鼓腹輕煙淡粉梅妍柳

翠也姜明叔蓉塘詩話謂皆在聚寶門外然中既以清江石城為名必不在聚寶門矣周吉父撰金陵瑣事謂有十六樓在城內者曰南市曰北市在聚寶門外之西者曰來賓在聚寶門外之東者曰重譯在瓦屑壩者曰集賢曰樂民在西關中街北者曰鳴鶴在西關中街南者曰醉仙在西關南街者曰輕煙曰淡粉在西關北街者曰柳翠曰梅妍在石城門外者曰石城曰謳歌在清涼門外者曰清江曰鼓腹所載特詳楊用脩藝林伐石遺南市北市陳魯南金陵世紀遺清江石城因曲就十四樓之目而誤也相傳定正蔡傳書成宴編纂諸臣於醉仙樓上然揭孟明詩云詔出金錢送酒壚綺樓高會集文儒題曰宴南市樓則非醉仙明矣實錄洪武二十七年八月庚寅新建京師酒樓成先是上海內太平思欲與民偕樂乃命工部作十樓於江東諸門之外令民設酒肆以接四方賓旅既又增作五樓至是皆成賜百官鈔宴於醉仙樓九月癸丑定正蔡傳書成賜諸儒宴又鈔俾馳驛遠是則編纂諸儒先與百官並賜宴者醉仙樓也繼以書成賜宴者南市樓也蓋酒樓本十六其一北市樓建後被焚此實錄止言增建五樓也當日諸樓皆有官妓不獨輕煙淡粉梅妍柳翠為然故李公泰敘通集句詩於北市則云極目亂紅妝於集賢則云妙舞向春風於清江則云時轉過雲聲於鼓腹則云舞破月初斜於石城則云翠袖拂塵埃於來賓則云煙花象外幽於鶴鳴則云白日移歌袖而孟同詩云詩寫桃花歌扇底酒攜楊柳舞樓前又云龍虎關河環錦繡鳳皇樓閣麗煙花又云趙女酒翻歌扇濕燕姬香襲舞裙紆追憶承平都會之盛君臣相遇之隆亦一致佳話也

明詩綜卷七

童

冀
四首

冀字中州金華人洪武丙辰被徵修書後為湖

州府學教授調北平坐罪卒有和陶集

姚廣孝云
中州才力

老成問學淹貫二十年來奔走南北雖涉歷世故樂天知命有合於一靖節之志趣其和詩如繭抽泉決略不見其艱窘矧有牽強者耶

庚子歲五月中從都還阻風于規林

我昔少年日無事幸休居佩弦戒性緩每師董安于迨
茲桑榆景始悟失東隅屢將孱弱軀觸目風波塗嚴冬
朔風急夜截高郵湖豈不幸剝涉為計良已疎古人誠
垂堂况我疾病餘前塗諒多險欲悔將焉如

水車行

零陵水車風作輪綠江夜響盤空雲輪盤團團徑三丈

水聲却在風輪上大江日夜東北流高岸低圻開深溝
輪盤引水入溝去分送高田種禾黍盤盤自轉不用人
年年祇用修車輪往年比屋搜軍伍全家載下西涼府
十家無有三家存水車卧地多作薪荒田無人復愁旱
極目黃茅接長坂年來兒長成丁夫旋開荒田納官租
官租不闕足家食家家復藉水田力一車之力食十家
十家不憚勤修車但願人長在家車在軸不憂禾黍秋
不熟

蜀泥行

朝畷泥暮畷泥河水澆田河岸低吳中有田多鹵斥河
水高於田數尺雨潑浪拍岸善崩歲歲畷泥增岸塍載
泥船小水易入船頭踏人船尾立吳兒使竹勝使篙竹
筐渡泥如濁醪此身便作淘河鳥河水終多泥漸少君
不聞越上之田高於城連車引水千尺坑車聲軋軋夜
達明田間濁水無時盈吳田苦澇越苦旱越水常枯吳
水滿嗟乎世間至平惟水猶不平請君不用觀世情

贈丹崖隱者

吾聞零陵東有丹崖山青天削出青孱頑丹梯百丈不
可得仙人煉藥巢其間丹成仙去已千載至今草木餘
清寒我來弔古訪陳迹石磴側足難躋攀上有撐雲拄
日之喬松下有懸崖噴壑之驚湍幽林野鳥作人語陰
澗或有蛟龍蟠何人結屋倚蒼翠抱琴林下聽潺湲乃

是丹厓仙人老孫子少年早脫名利關祇今五十如處
子雙鬢鴉墨顏渥丹門前種秫釀春酒屋後藝菽供朝
餐留我石上煮清茗松花落地雲斑斑我家金華五十
里失身作客天南端徵書昨夜趣歸興葉舟徑下湘江
灘弘文館深難置足神武門高宜掛冠山中草屋幸無
恙拂衣歸共浮雲閒明年花開儻相憶把酒相望興長
歎

趙撝謙

撝謙名謙一名古則餘姚人洪武初徵修正韻

出為中都國子監典簿罷歸尋以薦召為瓊山

教諭卒於官有考古餘事

黃太沖云先生詩有考古餘事千篇未曾傳世

明詩綜卷七

三

詩話明祖正韻一書出自獨斷天子考文諸臣敢不敬應撝謙於六書四聲最精焉有盡棄其學而順帝之則其見點也必因不苟附和而然不在年少也既歸築考古臺逆聲音文字通書成賦詩云文字聲音歎久訛十年辛苦事研磨誰云尤約知音書未詩揚雄識字多魚魯從今堪辨析鼎彝由昔費摩挲總憐朋輩微鍾子歸臥雲山看薛蘿當知臺名考古心非正韻為今矣

古風次倪安道韻

荒哉周穆王八駿窮萬里朝發崑崙巔夕飲瑤池水
歌白雲謠千載汙人耳三復祈招詩感歎不能已

明詩綜卷七

